

佛說大方等大集菩薩念佛三昧經卷第一

隋天竺三藏達磨笈多譯

序品第一

爾時婆伽婆在王舍城耆闍崛山中與大比丘衆千二百五十人俱一切皆是大阿羅漢諸漏已盡無復煩惱心善解脫慧善解脫調伏一切猶如大龍捨離重擔不受後有所作已辦獲真已利住平等智入解脫門自在得度衆苦彼岸惟除尊者阿難一人復有無量諸菩薩摩訶薩衆皆從十方世界來者各與

一切菩薩摩訶薩衆俱復有無量淨居諸天子其名曰難陀天子須難陀天子梅檀那天子須摩那天子自在天子大自在天子難勝天子善威光天子如是等諸天子衆過夜半已放大光明直照於此耆闍崛山已咸詣佛所頂禮尊足即以天多摩羅跋香天沉水香天多伽羅香天末栴檀香及牛頭栴檀香如是等種種諸香慇懃再三散於佛上已復以天散華及天雞婆羅華摩訶雞婆羅華曼陀羅華摩訶曼陀羅華曼殊沙華摩訶曼殊沙

華阿地目多華以如是等種種衆華亦慇懃再三散於佛上已而復漸進前詣佛所右遶三帀一心恭敬合十指掌稽首禮佛退住一面爾時諸天子衆各如是念今此菩薩念一切佛三昧法門過去諸如來應供等正覺已曾於彼天人大衆中宣揚分別利益一切諸衆生故今我世尊豈不爲斯天人大衆梵魔沙門婆羅門諸龍夜叉乾闥婆阿脩羅迦樓羅緊那羅摩睺羅伽人非人等敷演宣說如是妙典爲欲利益一切世間天人大衆故亦

今未來世一切衆生咸蒙利益故爾時難陀天子須難陀天子梅檀那天子須摩那天子自在天子大自在天子難勝天子善威光天子如是一切諸天子衆作是思惟已即白佛言世尊婆伽婆今此菩薩念一切佛三昧法門過去諸如來應供等正覺已曾爲諸天人大衆梵魔沙門婆羅門諸龍夜叉乾闥婆乃至一切人非人等敷揚演說如是經典利益世間諸衆生故惟願世尊大慈哀愍今亦爲此天人大衆梵魔沙門婆羅門及彼一切人

非人等演說如是方等法門令諸世間多獲利益安隱快樂故爾時世尊大悲熏心為欲利益一切世間諸衆生故默然受是諸天子請時諸天子見佛默然知聖哀許頂禮佛足圍遶三匝即於耆闍崛山忽然不現還於天宮爾時世尊過夜後分將明旦時便作大師子王馨歎之聲而復微笑時佛如來應供等正覺忽發如是殊異聲已須臾之間是耆闍崛山精舍所有諸比丘衆承佛威神一切皆悉集於如來應供等正覺所爾時復有衆多

異阿蘭若處諸比丘等具大神通有大威德亦皆承佛威神俱從阿蘭若處來入耆闍崛山集如來所爾時王舍大城一切諸比丘尼亦皆承佛威神入耆闍崛山集如來所爾時摩伽陀國主韋提希子阿闍世王與無量百千眷屬前後圍遶入耆闍崛山集如來所爾時復有諸夜又大將其名曰阿吒婆迦曠野居夜又大將伽陀婆迦驢形夜又大將金毗羅摩竭魚夜又大將須脂路摩針毛夜又大將摩羅陀黎持華鬘夜又大將如是等諸夜

又爲首并餘諸夜又輩有大威神具大勢力
各與無量百千眷屬前後圍遶入耆闍崛山
集於佛所爾時復有諸阿脩羅王其名曰大
叫羅睺阿脩羅王種種可畏毗摩質多阿脩
羅王須娑睺善臂阿脩羅王波訶羅舒展陀
阿脩羅王有大威神具大勢力聞佛警歎聲
心生驚悚舉身毛豎各與無量百千眷屬前
後圍遶來入耆闍崛山集於佛所爾時復有
此三千大千世界所有諸大龍王及其眷屬
彼各聞佛警歎聲時心生驚悚身毛皆豎承

佛威神來入耆闍崛山集於佛所爾時舍婆
提大城給孤獨長者亦與無量百千眷屬前
後圍遶自舍婆提詣王舍城入耆闍崛山集
於佛所爲欲恭敬供養如來聽聞正法故爾
時毗舍離大城亦有無量諸黎車子皆生大
淨婆羅門家其名曰善思黎車子伏怨少壯
黎車子功德生黎車子無邊手黎車子舉手
黎車子然手長者子如是等而爲上首皆已
久住無上大乘各與無量百千眷屬前後圍
遶自毗舍離詣王舍城入耆闍崛山集於佛

所爾時瞻波大城復有無量諸長者子已於
過去供養無量無邊諸佛種諸善根具大威
德有大勢力其名曰善住長者子利益長者
子無邊精進婆羅門子如是等而爲上首及
餘無量長者居士各與無量百千眷屬前後
圍遶自瞻波城詣王舍城入耆闍崛山集於
佛所爲欲恭敬供養如來聽聞正法故爾時
波羅奈城有無量種異類人衆已於過去供
養無量百千諸佛植諸善根皆已純熟自波
羅奈詣王舍城入耆闍崛山集於佛所爲欲

恭敬供養如來聽聞正法故爾時拘尸那城
復有無量諸力士末羅子亦曾供養無量百
千諸佛世尊以久熏修諸善根故有大威德
具足勢力亦與無量眷屬圍遶自拘尸那詣
王舍城入耆闍崛山集於佛所亦爲恭敬供
養如來聽聞正法故爾時東方過無量恒河
沙諸世界中一切大梵天王并餘天衆有大
威德具大神通聞佛世尊大師子王馨歎聲
時咸大驚悚舉身毛豎承佛威神各與無量
千萬天衆眷屬圍遶皆自本處發來詣此娑

娑世界王舍大城入耆闍崛山集於佛所如是南西北方四維上下皆有如是無量恒河沙世界所有一切大梵天王及餘天衆有大威德及大神通聞佛世尊大師子王警歎聲時亦咸驚悚舉身毛豎承佛威神各與無量千萬天衆眷屬圍遶皆自本處發來詣此娑婆世界王舍大城耆闍崛山集於佛所爾時耆闍崛山其地弘博縱廣正等如此三千大千世界大衆充滿無有空處如杖頭許然彼大衆皆有無量大威德力及大神通一切天

人諸龍夜叉乾闥婆阿脩羅迦樓羅緊那羅摩睺羅伽人非人輩皆悉充滿爾時世尊知諸世間天人大衆一切集已復發如是大師子王警歎之聲發大聲已自精舍出至一方所而復微笑時諸世間天人大衆觀是事已各捨已服及諸華鬘以種種香而散佛上供養恭敬至心瞻仰爾時大衆中有尊者舍利弗尊者目犍連尊者大迦葉尊者須菩提尊者富樓那彌多羅尼子尊者羅睺羅尊者大劫賓那尊者大迦旃延尊者阿泥樓陀尊者

護世尊者守籠那尊者難陀尊者阿難等而
為上首及餘一切諸大聲聞皆是大德具大
神通一切皆來集斯會坐爾時大衆中復有
尊者彌勒菩薩摩訶薩越三界菩薩摩訶薩
踊大步菩薩摩訶薩初發心即轉法輪菩薩
摩訶薩善思菩薩摩訶薩大音聲菩薩摩訶
薩善行步菩薩摩訶薩越三世菩薩摩訶薩
持世菩薩摩訶薩文殊師利菩薩摩訶薩不
空見菩薩摩訶薩等而為上首及餘無量無
數菩薩摩訶薩皆於過去無量諸如來所種

諸善根衆行熏修功德成滿久已得住阿耨
多羅三藐三菩提爾時尊者不空見菩薩摩
訶薩見佛世尊復微笑已從座而起整容
服偏袒右肩右膝著地合掌向佛而說偈言
最勝無上兩足尊 無緣不應現微笑
一切世間無等侶 惟願為我演笑因
常施貧窮諸所須 亦說大乘最妙寶
能與生盲拔眼膜 今事微笑何因緣
世尊三界尚無比 何況世間得論勝
能作世間大導師 今應顯笑有何緣

爾時世尊即告不空見菩薩摩訶薩言不空見汝今見斯勝地方所左右邊動衆相莊嚴可愛樂不不空見言如是世尊如是婆伽婆佛復告言不空見汝應當知此地方所往古諸如來應供等正覺已曾受用教化遊居爾時不空見菩薩聞佛教已速疾而行趣彼方處至彼方已便入三昧住三昧時自然成就上妙寶座種種莊嚴皆悉具足嚴飾座已還詣佛所頭面禮足而白佛言世尊今此方處莊嚴若是惟願世尊亦當及時處斯勝地爾

時世尊便往方所至方所已如法陞座於是如來應供等正覺陞此座時如此三千大千世界一切大地六種震動所謂動徧動等徧動震徧震等徧震涌徧涌等徧涌吼徧吼等徧吼起徧起等徧起覺徧覺等徧覺東涌西沒西涌東沒南涌北沒北涌南沒中涌邊沒邊涌中沒時此大地如是動已佛神力故徧此世界有大光明令諸衆生等受快樂下至阿鼻大地獄中所有衆生蒙光觸身諸苦消滅等受快樂如是一切諸地獄中受苦衆生

及以諸畜生輩更相殘害閻羅王界諸餓鬼等遇斯光已所有苦具皆悉消除飢渴充滿無有衆生不受樂者當爾之時一切衆生悉捨惡念皆起慈心迺相愛樂各懷悲愍猶如親屬相視歡欣和合同坐於是讚曰

世尊處斯座	能放大光明	大地六反動
令衆生歡喜	如來處斯座	法王放光明
當知如是時	衆生等受樂	正覺處斯座
大智歸依處	放光利世間	徧照此佛刹
奇哉是大乘	最勝乘無上	如來處斯座

利益難思議 奇哉是大乘 最勝乘無上

沙門娑羅門 於此莫能測

爾時世尊出廣長舌徧覆於此三千大千世界已告諸菩薩摩訶薩及諸大聲聞衆言諸善男子汝等當知昨中夜後歎有淨居諸天難陀天子須難陀天子栴檀那天子須摩那天子難勝天子乃至須多波天子等與無量諸天子有大威德具大神通放盛光明直照耆闍崛山來至我所即以種種天上妙香所謂天末栴檀乃至天多摩羅跋香等散於我

上復以種種天華所謂優鉢羅華乃至大曼
 殊沙華等供養於我右遶三帀頂禮我足退
 住一面彼退住已更於我所增敬上心合十
 指掌默然而住住已即作如是思惟今此一
 切菩薩念佛法門過去諸如來應供等正覺
 已曾為彼天人大眾宣揚解釋民一惟欲安樂彼
 諸眾生今者世尊亦當為此天人大眾如是
 演說念佛法門安樂利益諸眾生故彼諸天
 子如是念已即便請我說此法門時我默然
 許為其說諸天知已於是不現爾時世尊即

說頌曰

比丘知	昨中夜後	淨居天王	摩醯羅
將諸天眾	及眷屬	難陀及以須	難陀
須摩那天	栴檀等	乃至難勝	須多波
普放世間	勝光明	直照此山	耆闍崛
彼天既來	至我所	以天華香	而供養
然始右遶	我三帀	頂禮恭敬	一面住
彼諸天子	默生念	今此念佛	修多羅
過去最勝	曾廣宣	憐愍世間	眾生故
我今釋尊	十力具	寧不演說	斯法門

利益世間諸群生 安隱一切天人故
諸天念已便發請 時我默然遂許之
我故欲於耆闍山 如先諸佛所演說
天知我已許之故 生大歡樂尊敬心
一切咸復恭敬禮 右遶三匝然後去
比丘汝輩當善聽 我聞過去諸佛說
莫於是處生驚疑 諸如來智難可測
往昔諸佛所行道 我先知盡無復疑
現在一切人中尊 所得菩提我已證
當來大悲愍世者 自然法身我覺知

我今具足無礙智 如是大智難稱量
超出世間無與等 一切衆生莫能測
不空見本事品第二
爾時世尊告尊者舍利弗尊者大目犍連尊
者大迦葉尊者須菩提尊者富樓那彌多羅
尼子如是等具足神通有大威德諸大弟子
言汝諸比丘如汝所知依汝境界當於我前
各師子吼何以故若汝說者令此一切天人
大衆諸聲聞人咸得信解故爾時世尊復告
彌勒菩薩摩訶薩文殊師利菩薩摩訶薩越

三界菩薩摩訶薩超不思議菩薩摩訶薩善
 行步菩薩摩訶薩初發心即轉法輪菩薩摩
 訶薩善思惟菩薩摩訶薩大音聲菩薩摩訶
 薩持世菩薩摩訶薩不空見菩薩摩訶薩等
 言不空見汝今應當大師子吼決定請說諸
 佛世尊所得功德真實相貌汝若請者則能
 利益一切世間諸衆生輩是故我今躬自勸
 汝時彼不空見菩薩聞聖教已即於佛前以
 偈讚曰

世尊百福金色身 慈悲妙覺第一義

功德智慧斯無滅	忽令我請何因緣
無有等類人中尊	世間勝智靡超者
法王功德已究竟	何緣今日勸我請
佛滅清淨禪第一	智慧深妙解脫真
解脫知見光圓滿	何故今日勸諮問
法王威儀咸具足	一切世間最尊雄
既能自利亦利他	大師何因勸我請
世尊慈悲久淳至	曠劫常行無怨親
無障礙辯難稱量	何因世尊令我請
能施一切貧乏財	亦開世間生盲眼

勝尊能令怖者安	何緣世尊勸我請
佛身滓穢不能汙	衣服本來離塵垢
生處王中聖王家	何因今者方勸請
聖衣離身四指間	終無近體而能住
旋嵐巨風吹不動	聖尊何事而勸請
世尊尋常行路時	所至窅凹自平滿
或經高阜即坦然	何因今日令我請
世尊身相悉圓滿	行步肢節無動搖
由得不壞難思議	不應今日令我請
我觀世尊迴顧時	大地便隨六反動

無有神足若如來	如是自在人中最
世尊光明所照觸	能令狂者不失心
但能暫觀如來光	或時失念旋即復
世尊行時足動塵	衆生遇者七日樂
乃至壽終隨意生	故我歸命與樂者
若人遭病受大苦	衆痛酸迫不能堪
暫蒙世尊以手摩	即得安隱不可說
世尊法身具斯力	皆因曠劫長時修
是處終無有疑惑	導師不應勸我請
人中獨尊種種能	調伏大仙度一切

我今還白天人師 是故不應勸我請

爾時世尊復告不空見菩薩言善哉善哉汝
不空見快說是事善思念之吾當解說不空
見言如是世尊惟願廣說我今諦受佛告不
空見我念過去無量無邊阿僧祇劫時彼有
王名無邊精進有大神通具足威德正法治
化所居大城名曰善住其城寬曠東西具滿
十二由旬南北惟有七由旬半城有七重其
城重別皆以七寶所謂金銀瑠璃玻瓈碼碯
磲磔真珠珊瑚盡用如是衆寶間錯復次不

空見當知彼城城有四面面別三門門各皆
有二闕相對樓閣高廣莊嚴殊麗具足咸以
妙寶合成當其門中豎帝釋勝幢以為門限
乃至所有楣椳樞闔一切皆是衆寶廁寶復
次不空見彼城諸門或有金銀二種絡網羅
覆其上復於網上種種嚴飾金網銀鈴銀網
金鈴清風吹動出微妙音具足和雅猶如天
樂復次不空見彼城七重於七重內具足寶
階斯有欄檻鏤綺分明七寶所成雜色可愛
於金欄處垂白銀茸於銀欄所懸真珠茸於

珠欄處懸瑠璃茸乃至種種諸綵交錯衆寶
 間懸互相映發復次不空見彼城七重周市
 皆有寶漸圍繞所謂金銀瑠璃玻瓈碼碯諸
 種莊嚴皆用寶成其塹各有七寶階陛雜色
 分炳微妙可觀復次不空見彼精進王諸塹
 水中妙華盈滿所謂優曇鉢華鉢頭摩華拘
 物頭華分陀利華如是衆華光明可愛鮮潔
 柔輒芳烈遠聞衆生受用無遮護者復次不
 空見彼精進王其塹岸上植種種華所謂尼
 文迦多華鉢帝劍華阿地目多迦華瞻波迦

華婆黎師迦華拘毗羅陀華達奴迦利迦華
 如是諸華香鮮可愛猶如天華民人取用亦
 無遮護復次不空見彼城各有七重行列多
 羅寶樹周市圍繞鮮明可愛七寶合成其黃
 金樹白銀為葉及以華果白銀樹者真珠為
 葉及以華果真珠樹者瑠璃為葉及以華果
 瑠璃樹者玻瓈為葉及以華果玻瓈樹者碼
 碯為葉及以華果碼碯樹者碑磔為葉及以
 華果碑磔樹者赤真珠為葉及以華果赤真
 珠樹者珊瑚為葉及以華果珊瑚樹者真金

為葉及以華果復次不空見諸多羅樹光茂
 可觀微風觸動出妙音聲若得聞者歡喜受
 樂如人作樂能出種種微妙音聲若有得聞
 無不愛樂彼多羅樹風來觸時出微妙音令
 人樂聞亦復如是復次不空見彼王城中常
 有如是種種諸聲民一未曾斷絕所謂象聲馬聲
 車聲步聲鼓聲貝聲箏篴聲琴瑟琵琶箏笛
 笳簫如是一切種種音聲未曾暫息王恒宣
 令國內民人誰有所須飲食衣服象馬車乘
 隨意所須皆悉給與復次不空見彼王城外

多羅樹林行人遊處在下休息若飲若食或
 卧或坐聞此寶樹諸微妙音莫不皆受五欲
 妙樂復次不空見彼精進王於大城內近遠
 皆如一射箭所置一華池四岸及底皆四寶
 成四面階道七寶莊飾所謂黃金階道白銀
 莊飾白銀階道瑠璃莊飾瑠璃階道玻瓈莊
 飾玻瓈階道碼碯莊飾碼碯階道珊瑚莊飾
 珊瑚階道琥珀莊飾衆寶雜廁見者歡喜復
 次不空見彼池復有諸種妙華所謂優鉢羅
 華鉢頭摩華拘物頭華分陀利華如是衆華

香氣芬馥衆生聞者無不愛樂於池岸上復植諸華所謂伊尼摩迦乃至達窳迦利華衆華可愛猶如天華彼華池門常開不閉人民往來無遮禁者復次不空見彼精進王於大城內置遊觀園於諸園中復有種種七寶樹林常有華果王與夫人後宮侍御同共遊處歡欣取樂門亦不限任彼人民遊觀嬉戲等受快樂復次不空見又於彼園內面各一箭所別置華池亦以金等四寶所成復用七寶嚴飾階陛衆色光麗見者樂觀彼池水內種

種諸華所謂優鉢羅華乃至分陀利是等衆華芳鮮可愛池岸復有各種林樹及諸華果所謂婆尼斫迦華陀摩那伽乃至達窳迦利華是等華果香鮮可愛人民取用無遮禁者復次不空見彼精進王稟性仁愛慈念衆生如母愛子亦常深心敬事沙門婆羅門刹利長者如子事父復次不空見彼王形量瓌偉挺異常人身體圓滿衆相具足面目端正顏色光榮威德弘普天人愛敬復次不空見彼王宿植德本生刹利家種姓尊高世無勝者

佛說大方等大集菩薩念佛三昧經卷第二

隋天竺二藏達磨笈多譯

不空見本事品之餘

復次不空見彼精進王以茲變憐愍多好行檀常爲大會無礙施主天下所有沙門婆羅門貧窮疾病諸乞求者隨須給與無有休歇復次不空見彼精進王凡所統領八萬四千城邑聚落皆是淨業勝因所感七寶合成於諸城上一一復造八萬四千栴檀樓觀諸門左右亭傳路次悉有堂舍衆寶莊嚴門無畫

夜常開不閉以擬一切等獲大安又諸城內衢巷街陌恒然燈燭有大光明令彼人民各力爲作同共受斯安隱快樂復次不空見彼精進王時有二子一名師子二名師子意諸根明利身相圓滿有大威德具足神通皆已先發阿耨多羅三藐三菩提心復次不空見當爾之時有佛世尊號曰寶聚如來應供等正覺明行足善逝世間解無上士調御丈夫天人師佛世尊出現於世常爲天人梵魔沙門婆羅門諸龍夜叉乾闥婆阿脩羅乃至一

切人非人等宣明正法初中後善義味深奧其文亦善純備無雜清白梵行復次不空見時彼寶聚如來應供等正覺常與七十二億百千諸大聲聞皆阿羅漢具足神通有大威德近善住城說法教化復次不空見爾時寶聚如來應供等正覺即於食時著衣持鉢與彼七十二億百千大聲聞衆前後圍遶威容詳雅入善住城次第乞食彼精進王適與二子在高樓上遙望見彼寶聚如來大衆圍遶端嚴殊特威德巍巍行人觀覩莫不樂見諸

根清淨心慮澹然上下調伏勝奢摩他到於第一功德彼岸具足圓滿一切種地王既見已生竒特心喜勇無量即與二子取諸華鬘塗香末香及餘名香俱出官門速疾持詣寶聚如來應供等正覺所奉獻供養佛及大衆頂禮佛足却住二一面復次不空見彼精進王及其二子即便要請寶聚如來與諸大衆盡形供養所謂衣服器具飲食醫藥凡是所須悉皆奉給庶事隆厚聖衆獲安是精進王與其二子宿植德本常求佛法今既遭逢又蒙

受請心生歡喜慶幸特深復次不空見時彼
寶象如來應供等正覺於天人中說法教化
所應作已便於中夜入無餘涅槃不空見時
精進王聞彼世尊般涅槃已即與夫人及其
二子躬率群臣及諸民衆詣彼世尊般涅槃
處至已敬禮世尊足下悲號啼哭椎胸大叫
舉身投地如樹中摧躪地宛轉而傷歎曰世
尊滅度一何駛哉大聖涅槃遺棄我等世間
方盲導師長逝衆生貧困商主告終世界將
昏慧燈忽滅不空見彼精進王如是追慕極

悲歎已方與二兒詣世尊所以諸香水沐浴
聖身復用衆香徧塗尊體更以種種殊異華
鬘微妙樂音盡虔供養然後方用迦尸迦衣
妙氈纏裹安處金棺及以鐵槨其棺又以七
寶雜廁如是盛置彼佛身已方聚清淨赤妙
栴檀高一由旬縱廣正方一拘盧舍散諸種
華及以華鬘燒然殊勝塗末香等灌以酥油
然後起火闍維寶聚如來色身復次不空見
時彼王子師子既見如來般涅槃已如是思
惟天人大師捨我滅度我於今日何義苟存

今我若獲隨從如來應供等正覺而取滅度
豈不樂哉不空見時彼王子如是念已用諸
名香自塗其身復以諸香熏其衣服以鬘纏
裹然後周圍放大猛火焚燒其身火熾盛已
師子方於猛焰之中發大誓願救諸衆生歌
讚歸依如來功德以偈頌曰

世間寶中最尊上 今日捨入無餘
天人大師轉法輪 我等從此不復覩
法王利益無量衆 今已棄置入涅槃
吼宣如是大菩提 長不復見衆圍遶

不可思議大導師 說法能令聞者喜
一切天人諸魔梵 從今永絕不聞聲
能施貧窮法財寶 爲衆演說皆樂聞
諸天龍鬼人非人 自此長往無歸趣
世間從此無所依 偏悼我王何恃怙
并師子意失覆護 永不聞佛說法音
我寧捐軀及壽命 無用獨住於世間
以是今滅所愛身 因茲更廣弘誓願
我於佛所種善根 父王亦常尊三寶
先願以此諸功德 今王及我證法身

於不思議諸佛所	普願群生同斯福	世尊滅度我焚身	一切皆同等正覺	若人覺悟及夢中	彼必成佛無有疑	我此愛身終敗壞	願彼食我諸蟲獸	令我誓行精進事	令我速得調御師
供養修行衆善業	亦令我誓無虛言	其有得聞或親見	非彼現在身證者	但令見我今所作	非彼現在身證者	事同水沫無堅牢	皆得速成菩提道	或有毀罵或輕訶	非彼現在身證者

我求無上正覺時	即於世間疾成佛	我今所願及未發	若此誠誓必不虛	如我暫得覩世尊	今我雖復盛焦然	世尊智慧無障礙	如昔廣利諸衆生	濟世大師若暫起	佛知師子心精誠
其或慈心相觀視	非彼現在身證人	為是焚燒所愛身	令我還見滅度佛	何異天師重出世	猶翼身存得觀佛	常轉三世清淨輪	令我見佛從火起	如先威力普眼尊	為之暫起現神力

廣與世間興變事	今無量眾賦患身
畢竟利益諸眾生	還復焚身入寂處
大眾觀佛巨神變	以清淨意讚妙音
諸佛妙法難思議	戒及禪定亦復然
智慧解脫不可量	神通變化亦難測
雖已滅度能淨我 <small>民二</small>	今故歸命焰熾身 <small>五</small>
世尊威德無有比	神通已達彼岸邊
滅度能令生厭離	今我歸依普眼觀
慈悲一切最尊勝	能以自心知他心
悉治無邊界眾生	歸命無諍善逝者

於諸醫中第一尊 常以妙藥施眾生
 能除無量眾病苦 歸命憐愍救護人
 以我稱讚諸善根 恭敬供養諸功德
 放捨愛身所獲福 先願利益諸眾生
 不空見時彼王子師子發斯大願以自莊嚴
 然後增火卒捨身命時諸世間天人梵魔沙
 門婆羅門乃至一切人非人等見斯事已成
 於世間生重厭離復次不空見時彼王子捨
 身命已即生梵天作大梵王於諸梵中最尊
 最勝有大威德具大神通不空見時彼王子

生梵宮已即自思惟我從何處作何善根而
來生此得有如是功德果報大神通力作是
念已便自了了分明見知我於人間為精進
王子我與父王眾具供養恭敬歌讚寶聚世
尊世尊滅度我即焚身於彼熾然猛火之中
發大誓願歎佛功德以此善根今生梵宮然
我今應還下人間開慰我父答所生恩復當
供養寶聚如來入於涅槃燒身處也復次不
空見時大梵王如是念已與眷屬天於彼宮
沒猶如壯士屈伸臂頃即至人間往詣寶聚

如來應供等正覺闍毗身處以天眾香所謂
天末栴檀及天牛頭沉水多摩羅跋香等而
為供養復散種種天上妙華華若車輪猶雲
徧滿而為供養師子梵天供養佛已方慰其
父精進王言大王當知王子師子燒身喪命
今我是也我時即生大梵天中願王勿復憂
悲痛惱惟應歡喜深自慶快何以故王今已
獲第一大利所以者何諸佛世尊難遭難遇
而王已得值遇世尊寶聚如來應供等正覺
尊重恭敬具足供養是為希有第一大利是

故大王從今已後惟當一心受持是法弟師子意亦應如是受持此法復應供養世尊舍利處處流布廣興塔廟我於梵宮亦常如是持斯妙法遵奉舍利如是言已忽然不現復次不空見時彼精進王聞梵語故即與其子師子意者往詣寶聚如來應等正覺舍利之所恭敬禮拜歌誦讚歎持一切香一切華鬘并諸音樂復持諸幢幡寶蓋奉獻供養又少時間於彼八萬四千諸城純以七寶興起八萬四千塔高一由旬面各廣長一拘盧舍

殊特端嚴光曜可愛安止舍利咸令供奉又於一一寶塔之所常然八萬四千燈明各各復以一切名香一切妙華及以華鬘一切幢幡一切寶蓋一切樂音鼓螺角貝鍾鈴磬鐸凡是眾具莫不畢備如是供養受持是法彼精進王以斯善根於八萬四千劫不生惡道及師子意亦同果報王大夫人名曰善意其最大臣名曰無瞋亦於八萬四千劫中受勝果報彼王如是於諸劫中次第供養六萬諸佛所生常受轉輪王身正法治化利益眾生

後次不空見彼寶聚佛滅度之後時節未幾
有一菩薩摩訶薩名普密王現生世間爲世
間故捨家出家示修苦行詣菩提樹坐於道
場以一念慧斷除無明煩惱習氣即證阿耨
多羅三藐三菩提不空見時彼師子大梵天
王以天眼觀見普密王如來應供等正覺出
興於世即復還下住虛空中持天衆香及以
妙華散於佛上然後至地右遶三匝恭敬合
掌頭面禮拜勸請世尊轉大法輪時彼師子
梵王住於佛前以偈請曰

世尊今應闡妙法 我等衆生堪聽聞
智慧摧敵今適興 一切世間莫能毀
如來無上調御者 具足至真十種號
利世大師今已起 自然正覺妙菩提
功德圓滿人中上 聖智久修非始然
世尊但爲演妙音 今此大衆樂聞受
弘誓本爲度世間 無歸依者作覆護
如昔所願今旣滿 已到寂靜無爲處
今當速開甘露門 能壞三縛出衆惱
梵王陳請義已周 如來於是默然許

於須臾頃普密佛 遂令彼梵極歡喜
 及無量億天人眾 以聞善逝轉法輪
 時彼梵天蒙說已 廣持眾具奉報恩
 於是復發弘誓願 為求無上菩提處
 今於普密世尊前 陳我所作諸功德
 以此善根所生處 此二 常奉十力諸世尊
 我昔道場供養佛 請聽慈說利眾生
 因是微善凡所居 願於佛前常歌讚
 爾時世尊復告不空見菩薩摩訶薩言不空
 見時彼精進王子師子梵天以燒身善根得

生梵宮次第供養五千諸佛聽聞正法增長
 善根常發廣大不思議願不空見汝今當知
 爾時無邊精進王者豈異人乎即我身是時
 彼不空見菩薩復白佛言世尊彼王二子師
 子及師子意者今何所在為於現世供養諸
 佛為已滅度在他世耶佛言不空見汝知爾
 時王子師子意者今此彌勒菩薩摩訶薩是
 爾時王子師子者即汝不空見菩薩是也以
 汝於彼寶聚如來佛法之中發大誓願一捨
 身故能令三萬天人大眾發阿耨多羅三藐

三菩提心彼輩終必證大菩提無有疑也爾
時世尊為重宣此義以偈頌曰

我觀過去久遠劫 佛號寶聚無上尊

無師自覺現世間 能益天人羣生類

具足百福金色相 慈心顯發實義門

開示衆生菩提路 吼唱能盡衆苦源

寶聚挺特人中勝 七十二億衆聖賢

三明六通具八解 隨佛入城而分衛

我於爾日為勝王 無邊精進大威力

恒將二子從左右 因巡遊觀處高樓

遙見調伏大仙神 比丘僧衆悉圍遶

我時及子趨疾下 馳詣無等尊勝前

既至大師善逝所 施設諸種妙供具

頂禮尊足口發言 啓請如來及僧衆

衣食衆具盡形奉 滿足八萬四千年

并是二子淨信心 為求無上菩提故

人中極尊既涅槃 興起八萬四千塔

衆寶間廁奇光曜 但為人寶遺餘身

一一城中寶塔所 各然無量百千燈

香華音樂鼓鍾鈴 彼王為佛興斯供

因種如是勝善根	次第遭遇六萬佛
悉皆供養親承事	為求無上大菩提
汝不空見勿復疑	曩時統領大地主
彼深智王我身是	其號無邊精進力
常以華香修供養	教化一切諸衆生
具然無量百千燈	為世除闇作光明
施與財寶未曾休	聽聞正法亦無厭
精進苦行不暫捨	為證無上大涅槃
汝於寶聚如來所	以衣纏身火洞然
猶如燈炷塗膏油	須臾火至即熾燼

汝時身火熾焰盛	毛色無動神不驚
於彼人寶滅度日	爾躬如是超世間
猛火如斯煎迫時	汝猶方便而勸請
願見世尊從火起	大悲護世現本形
我今所願成就者	方得如意捨身命
但能暫見如往昔	所獲功德不思議
我凡所有諸誓言	冀其一切皆和會
若我當來必成佛	願於猛焰見世尊
佛智清淨無障礙	於彼三世坦然平
照明師子淳淨心	佛以精誠從火現

不空見此願力持	護世須臾應念起
因茲更發莊嚴誓	不思議願實難量
世尊從彼火起時	一切皆得厭離心
又以淨意發讚音	佛威希有難可測
無邊相好火盛然	法王應念忽便起
以佛世尊現神變	千數衆得解脫心
汝不空見知師子	大慈應感忽還坐
由見世尊此神變	千數衆發菩提心
大悲為世利益已	還復偃卧猛火中
師子於是放捨身	一念往生大梵處

即從梵宮還佛所	具足供養人中尊
奉持微妙天華香	投散彼佛碎身地
彼寶聚尊涅槃後	其間時節無幾何
復有普密天人師	為利世間故興世
坐於道樹等至真	是天中天號大覺
大梵天王設供養	恭敬頂禮兩足尊
請轉法輪利世間	佛知心淨默然許
梵王聞法大歡慶	身得安樂心怡然
更發殊常大誓願	植不思議衆善根
一劫值遇五千佛	皆得親承興供養

智者不應更他疑 彼時師子汝即是
不空見時爲吾息 汝後事佛經五千
我皆明見汝燒身 求斯無上菩提道
汝復無量千佛所 於彼滅度舍利時
亦燒無量所愛軀 皆爲他樂自受苦
我知汝今及異世 無量千生長時修
或佛現在或涅槃 汝常建斯誠實語
經昔無量百千生 惟我神力能知汝
不空汝久發斯願 果報今者皆明現
汝於諸佛大師前 不思議行悉圓滿

常業歌讚兩足尊 苦行熏修諸大誓
今獲偈歎大法王 斯由往積勝因緣
又於普密王佛前 攝取最上無邊願
汝今果獲如斯報 蒙佛如來現威神
時不空見於衆所 恭敬合掌頂禮佛
請問天尊調御師 慈悲利益衆生事
大仙我曾何誓願 而能捨棄無量生
惟願世尊開少分 我蒙聖說乃能了
不空汝於往昔事 吾今爲汝粗說之
汝於雲音如來所 已發如是廣大願

諸佛若證菩提時 當令我身常奉觀
 又於帝幢普眼佛 彼時亦發大誓願
 世間若有最導師 當令我即同斯道
 汝於日燈如來所 亦發勝妙諸行願
 汝不空見惟我知 造作眾寶經行處
 或管壯麗佛精舍 民二 若構殊異僧伽藍
 彼皆微妙七寶成 一切資具奉諸佛
 於不思議眾所尊 人中師子善生佛
 持七寶蓋及眾具 供奉超世天中天
 於彼普眼如來所 爾時又起妙願行

廣施燈明眾供設 奉獻世間天人師
 汝於如是無量佛 過千萬億那由他
 自受勤苦安眾生 發彼莊嚴弘廣誓
 汝於普密王佛前 所發誠願我今說
 如其修行成佛者 我所散華徧大地
 汝於雲雷音佛所 為世間故發斯願
 若有眾生聞我名 願彼咸即成佛道
 復於帝釋幢佛前 廣興供養因誓願
 凡我所處若見聞 彼彼皆得成佛道
 汝於日燈如來所 奉施七寶經行處

無邊威所大明佛	汝當爾時發願言
常施勝處妙莊嚴	願我佛刹亦如是
汝於月上如來所	願得第一最天宮
佛尊處中而遊化	衆生遊者悉成佛
汝於澡浴善逝前	實作如是至誠願
若於夏日盛暑時	衆生身心離熱惱
汝於鶩祇羅佛所	亦發如是增上願
恒於長夜黑闇時	願施燈明除迷惑
若我捨施身命處	其有食肉諸衆生
必皆成佛無有疑	非彼現在身證者

或於覺寤及夢裏	若有衆生聞我名
一切成佛無有疑	非彼現在身證者
汝於勇猛精進時	具有愛憎爾所作
斯等皆當成法王	非彼現在得證者
汝先無量世生處	於彼恒願求菩提
我今說汝實功德	當來必獲無上尊
若有禽獸及餘衆	彼必成佛無復疑
諸是食汝身肉等	一切自然證法身
我知汝有千數行	皆為利益諸衆生
若有聞者或生疑	以時未至我不說

永樂北藏

菩薩念佛三昧經

第二五册

佛說大方等大集菩薩念佛三昧經卷第三

隋天竺三藏達磨笈多譯

神變品第三

爾時尊者舍利弗尊者大目犍連尊者大迦葉尊者阿難及諸天人梵魔沙門婆羅門等咸作是念何因何緣今我世尊如來應供等正覺在於天人大衆中爲諸梵魔沙門婆羅門諸龍夜叉乾闥婆阿脩羅及以人非人等宣說如斯念佛三昧法門名已而未解釋即從座起還本住處默然寂坐耶爾時不空見

菩薩摩訶薩如是思惟今此天人梵魔沙門婆羅門及彼一切諸龍夜叉乾闥婆等大衆咸集而我世尊本處入定我今亦應少現神通現神通已爲令種種稱歎世尊大慈功德爾時不空見菩薩摩訶薩如是思惟已即入三昧三昧力故今此三千大千世界莊嚴微妙凡諸所有皆七寶成所謂金銀琉璃玻瓈碼碯碑磔珊瑚真珠如是衆寶之所嚴飾其地平正猶如手掌一切大地咸有如是寶諸多羅樹八道間錯羅布其中彼等諸樹端嚴

可愛金多羅樹白銀葉華銀多羅樹瑠璃葉
華瑠璃樹者玻瓈葉華玻瓈樹者碼碯葉華
碼碯樹者碑礫葉華碑礫樹者真珠葉華赤
真珠樹黃金葉華如是處處懸繒綵蓋垂諸
金鈴寶網羅覆建布幢幡皆用雜寶復以種
種微妙莊嚴周帀圍遶世尊住處一切多是
可愛衆華所謂優鉢羅華波頭摩華拘物頭
華分陀利華如是等華皆悉充滿於此世界
具足莊嚴清淨微妙其事亦爾爾時不空見
菩薩摩訶薩三昧力故復現如是莊嚴之事

令此三千大千世界所有大衆乃至天龍夜
叉乾闥婆阿脩羅迦樓羅緊那羅摩睺羅伽
人非人等一切衆故化作衆寶大蓮華座其
華具有無量千葉清淨柔軟譬若迦耶隣尼
天衣令諸衆生各相見知彼此咸得坐於華
座爾時不空見菩薩摩訶薩復於定中更現
如是大神通事令此三千大千世界一切大
地六種震動所謂動徧動等徧動涌徧涌等
徧涌起徧起等徧起震徧震等徧震吼徧吼
等徧吼覺徧覺等徧覺是六合三合十八相

民三

二

如是乃至中涌邊沒邊涌中沒猶如摩伽陀國赤圓銅鉢置於石上傾轉不定自然出聲如此三千大千世界不扣不擊自然出聲其事若此當震吼時彼諸衆生聞聲覺悟者一切皆受上妙觸樂猶如東方不動世界亦如西方安樂國土其中衆生等受快樂聞聲獲安亦復如是爾時不空見菩薩摩訶薩住三昧故心轉清淨無有垢濁隨順調柔遠離麤獷寂無變動心深潤澤普令安樂然後復作如是神通令此三千大千世界徧虛空中兩

熾然火不令滅壞衆生身心而彼衆生蒙火觸身皆得受斯微妙勝樂猶如比丘入火三昧恬然安樂觸火衆生怡悅亦爾爾時不空見菩薩摩訶薩以三昧力復作如是大神通事令此三千大千世界兩^三天栴檀細末之香其香微妙徧滿三千大千世界若彼衆生聞此香者皆得如是第一勝樂猶如釋迦如來應供等正覺其於往昔行菩薩時在彼燃燈佛世尊前受菩提記已得不思議希有妙樂時諸衆生聞天妙香不思議樂徧滿身心亦

復若此爾時衆中尊者阿難作如是念今何因緣忽見如是不可思議希有莊嚴此大神變誰所致乎然我世尊還房宴寂不當若是斯大神通豈我諸大聲聞衆中所能作耶爲此會衆多諸大人猶如龍象或其所作得非彌勒菩薩文殊師利菩薩越三界菩薩乃至不空見等亦是餘諸大菩薩摩訶薩輩具足威光現斯事耳爾時尊者阿難如是念已即白尊者大目連言大德我聞世尊常如是說我弟子中神通第一則目連其人也今現

是瑞將無大德之所爲乎時大目連答阿難言仁者此瑞殊常非我能作所以者何憶念我昔於一時間取此三千大千世界悉內口中其時衆生乃至無有一念驚懼覺往來想阿難又念我昔住梵天宮殿發一大聲徧此三千大千世界阿難復念我昔在世尊前作師子吼能以須彌內於口中能過一劫若減一劫如是爲常阿難又念我昔至陽焰世界於彼發聲徧此世界咸得聞知阿難又念我昔身在於此閻浮提界而能搖動忉利天宮

難勝大殿阿難又念我昔至彼難陀優波難
陀諸龍王所彼龍如是焰熾巨毒我時降伏
令住戒善又亦曾辱惡魔波旬阿難我念往
昔至於東方住彼第三千世界有一大城名
曰寶門於彼凡有六萬億千家人我即於彼
六萬億千家中一一皆現我目連身為彼衆
坐演說諸法無常苦空無我皆令安住如是
正法阿難我雖能為曩之變化初未曾見如
是神變云何作耶阿難今我處此大蓮華座
觀見十方一一佛土無量無邊同我世尊釋

長三

四

迦號者皆還本室默然寂坐而我見彼諸佛
國土亦如觀此娑婆世界阿難我於向時亦
以天眼周徧觀察是變因緣而終弗知所從
來處爾時大目連為重明此義以偈頌曰
我所成就四神足 同類孰能相校比
惟獨世尊天人師 餘人神通寧我及
我曾吞合此佛刹 大地衆生弗覺知
我又曾至梵天宮 一音充滿此世界
我又曾於世尊前 吞噉須彌若經切
我又焰界發大聲 令此佛刹徧聞聽

我又震動天帝宮	彼於天女眾中坐
我又往詣難陀所	降伏如斯大毒龍
我又念昔作神變	身在於此現東方
我今六萬億千家	彼彼各謂見我身
阿難我今所觀變	初未觀是大神通
我惟生大希有心	然是神通非我作
我今處大蓮華座	亦見眾生坐華中
復見諸佛大威王	觀察盡於十方界
決定自在天尊作	或能大士之所為
如是非常大神變	昔來未見今方觀

爾時尊者大目犍連作如是等師子吼時彼大衆中十千天人於諸法中得清淨眼爾時阿難白尊者舍利弗言大德我親從佛聞如是言我諸聲聞大弟子中智慧第一則舍利弗其人也今此神變將非大德之所作乎時舍利弗語阿難言阿難此瑞殊常非我所及所以者何我念自從二十年來精勤修習毗婆舍那一念觀察求法實相終不能知諸法邊際阿難又念我昔取一袈裟投置地上時大目連第一上座威神若是既不能取乃至

不能舉令離地何云手擎阿難又念我昔居
世尊前作師子吼亦於一切具足神通諸大
聲聞及學無學天人梵魔沙門婆羅門乃至
一切諸龍夜叉乾闥婆阿脩羅等諸大衆前
時彼外道波梨波闍來至我所與我諍入諸
禪定已復欲共我較隱其身競師子吼我於
彼時建丈夫志行丈夫事遂作如此諸不思
議惟除世尊一切知見及以彌勒菩薩摩訶
薩諸是一生補處者又除彼成就甚深法忍
諸菩薩摩訶薩又除得海德三昧諸菩薩摩

訶薩又除得善住三昧諸菩薩摩訶薩又除
得諸佛現前三昧菩薩摩訶薩除如是等諸
大菩薩摩訶薩已自外所有如來世尊聲聞
大弟子若來問我隱身時事乃至外道波梨
波闍等而更問我隱沒身時爲住何處者阿
難我作如是大神變時一切聲聞設辟支佛
皆不能知我身所在及其說時空聞我聲終
不能知我身所在阿難我常精勤大丈夫行
亦復成就大智人事也阿難我心隨我行非
我隨心行阿難我今自知身處大蓮華座亦

見一切天人大衆皆悉坐彼大蓮華座阿難
 我復見彼一切十方無量無邊不可思議世
 界中皆有諸佛世尊悉在菩提樹下坐於道
 場成等正覺具足成就無量無邊大威德力
 諸天大衆恭敬圍遶大梵天王請轉法輪曰

世尊若當轉法輪者我等隨順阿難我聞是
 聲我見是事今者如是無量無邊諸佛國土
 皆是七寶雜色繒綵懸諸金鈴羅網覆上種
 種宮殿微妙莊嚴如此娑婆世界阿難我於
 向時亦作是三此不思議大莊嚴事將非

世尊大神通作乎或是諸大菩薩摩訶薩輩
 厚集善根具足福智能現若斯大神變耳亦
 或世尊聲聞衆中諸大弟子久種善根具大
 威德之所爲也爾時尊者舍利弗爲重明此
 義以偈頌曰

世尊神力難思議三 及求如來功德者七
 所有聲聞大弟子 滿此佛刹學無學
 於彼智中我第一 云何更有勝我者
 惟除諸佛如來輩 及諸菩薩行菩提
 自我觀察諸法相 具足滿於二十年

求諸法底不得邊	我之智慧過於彼
今者在佛世尊前	欲以此智師子吼
具置一切諸外道	惟大聲聞求我身
終無有能見我身	及以所作諸神變
惟除如來等正覺	并諸佛子大菩薩
是乃知我身所在	非彼外道及聲聞
禪定解脫不思議	是心任我而迴轉
我修丈夫真空行	仁者我業常如是
我有如是勝神通	一切聲聞不能入
然我今所見十方	若斯神力我貪羨

我今處大蓮華座	徧見諸方無量土
無量刹中咸有佛	各詣佛樹坐道場
彼刹衆寶異莊嚴	端正微妙甚可愛
我時亦作如是念	決定如來現神通
或大弟子之所爲	於諸菩薩不空見
爾時尊者舍利弗作如是師子吼時衆中有	
一萬三千人遠塵離垢得法眼淨爾時阿難	
如是思惟此大迦葉有大威德具足神通今	
是變化或其所作我今亦當問其作不於是	
阿難即白尊者摩訶迦葉言大德我親從佛	

聞如是說我弟子中頭陀第一則大迦葉其人也是不思議大神變事將非大德之所爲乎時大迦葉答阿難言仁者此變殊常非我能作所以者何我念一時輒不自量在世尊前作師子吼阿難我時於此三千大千世界須彌山王及大鐵圍乃至諸餘黑山之屬一以口吹能令破散乃使無有如微塵許其有衆生住彼山者不令損害亦無覺知如是諸山皆悉滅也阿難我又一時於此三千大千世界一切大海大河小河陂池諸水乃至無

量億那由他百千水聚以口一吹皆令乾竭而彼衆生不知不覺亦無苦惱阿難我又一時在如來所及諸天人梵魔沙門婆羅門一切世間諸大衆前作師子吼廣現神通阿難我今惟有如斯威力能作如是自在神通阿難我念一時在於如來應供等正覺前爲諸世間天人梵魔沙門婆羅門一切大衆作師子吼世尊我能於此三千大千世界之內以口一吹即令大火熾然徧滿猶如劫燒終亦不使損一衆生亦令衆生竟不覺知阿難我

真具足如是神通阿難我念一時於此世界
以天眼觀見彼東方過億百千世界有一佛
刹猛火洞然我既見已如是思惟而我令應
示現神通既思惟已即入三昧於三昧中以
口一吹過於東方千億世界熾然猛火即令
潛滅彼火滅已天三我便出定即見彼界還復如
本阿難我今但有如是神力阿難今此衆中
有諸衆生若天若人若梵若魔若沙門婆羅
門多有疑心謂我妄言彼若不信世尊後時
從三昧起任自諮問而今世尊雖入三昧足

知是事亦聞我聲爾時世尊尚坐本處住三
昧中遙命阿難曰如是如是如大迦葉師子
吼說真實非虛汝當憶持時諸天人一切大
衆聞佛教已方於迦葉生希有心起難遭想
時彼尊者摩訶迦葉作如是等師子吼時有
三億人於諸法中遠塵離垢復有八十五那
由他百千諸天遠塵離垢得法眼淨爾時不
空見菩薩彌勒菩薩文殊師利菩薩越三界
菩薩如是及餘無量無邊諸大菩薩摩訶薩
等皆自久來被服如是大弘誓鎧聞大迦葉

作師子吼便化華聚若須彌山乃至再三散
迦葉上復多化作大七寶蓋住虛空中覆大
迦葉頂并覆一切聲聞大衆爾時大迦葉見
如是等諸七寶蓋遂告阿難曰阿難今此衆
中決定知有大乘高行菩薩摩訶薩能作如
是大神通事而今復現斯大神變也阿難我
今坐此大蓮華座所見諸方無量無邊不可
稱數諸佛世尊又見彼刹皆七寶成殊麗莊
嚴真可瞻觀彼諸衆生復有如是勝上果報
我今悉見猶如忉利一切諸天耽醉華冠常

帶瓔珞諸天身色如月光明於虛空中有化
寶蓋彼諸衆生一一頂上悉有寶蓋如我頂
上覆七寶蓋無別異也阿難我又見彼諸佛
刹土有諸菩薩自兜率天降入母胎阿難我
見如是神通事時深生歡喜踊躍無量阿難
我復思念如是奇異如是希有豈彼隨宜凡
劣衆生能作如是大師子吼能現如是大神
通事爾時尊者大迦葉爲重明此義以偈頌
曰
阿難十方大水聚 大海巨河諸流等

我以口風一往吹
 曾住正覺世尊所
 我能乾涸水聚時
 此界所有一切山
 能以口風吹令散
 衆生所有住須彌
 爾時今彼無損覺
 我以神通燒此刹
 彼等衆生不覺知
 我昔於此佛刹中
 令彼枯竭無遺滴
 於此刹中作神變
 衆生無損亦不覺
 須彌鐵圍黑山等
 仁者我住如是通
 及餘諸山不動處
 智者我有如是通
 口風一吹皆熾然
 當爾之時無毀壞
 遙見東方滿刹火

用口氣吹能滅彼
 我今見此大神通
 諸佛弟子不思議
 我今處此蓮華上
 菩薩降自兜率天
 為當定此聲聞輩
 為是菩薩不空見
 爾時阿難復作是念
 於一切法已到彼岸
 時能作如是大事
 我今亦應問其作不尊者
 我通如是難思議
 心生殊特大希有
 一切諸行亦如是
 觀彼衆刹妙莊嚴
 入於母胎盡生際
 心得自在神通人
 復彼彌勒文殊等
 彌多羅尼子
 足神通或

阿難如是念已即便白彼富樓那言大德我親從佛聞如是語我大聲聞諸弟子中說法第一則富樓那彌多羅尼子其人也是不思議莊嚴神瑞將非大德之所為乎時富樓那答阿難曰此瑞異常非我能及所以者何我念昔時有諸衆生應以神通得教化者我便為彼取此三千大千世界以手摩之開示彼等當爾之時無一衆生有驚怕想亦不覺知惟彼衆生應在此化與神通者乃能見我手摩世界阿難譬如壯士以右手取一迦黎沙

般那左手迴轉不以為難如是阿難我取於此三千世界以手迴轉不以為難亦復若此阿難我念一時於世尊前以一指節取此三千大千世界一切水聚皆令入我手指節間無一衆生有損減想阿難我往一時於初夜中以淨天眼過於人眼觀此三千大千世界作如是念是中復有何等衆生於諸法中心生疑惑我當解釋令得除斷我即觀此三千大千世界所有一切諸四天下無量衆生疑惑諸法我復生念我今應當不離是坐不出

是定爲諸衆生斷除疑網阿難我時念已便入定心清淨明了光澤成就寂然不動爲彼衆生宣說諸法決斷疑網無有滯礙令彼衆生各作斯念我等今者皆各蒙此尊者富樓那彌多羅尼子獨住我前爲我宣說阿難我三當初夜說法之時即有一萬四千衆生皆得安住佛正法中復有三萬衆生護持禁戒復令六萬衆生信佛法僧歸依三寶然始安詳自三昧起阿難我惟有是說法餘巧決疑事也阿難我又復念於此世界以天眼觀見彼

北方過三萬佛刹有一世界其號伏怨彼世界中有衆生於諸法中多起疑網時彼衆生有聲聞根易可受化然彼世尊般涅槃已我即生念我今亦應不起此坐不往彼刹而爲衆生解釋疑網如是念已即入三昧於三昧中爲彼世界無量無邊不可稱數阿僧祇諸衆生輩演說正法令彼皆得諸法光明阿難我但具是聲聞神通今此衆中若有疑者須世尊出請問自知如是語時佛神力故虛空出聲告阿難曰阿難如是如是如富樓那

大師子吼汝當憶持爾時諸天世人阿脩羅
 等一切大衆聞是事已發希有心生竒特想
 作如是言希有希有聲聞尚能建斯大事况
 彼菩薩諸佛世尊爾時尊者富樓那彌多羅
 尼子爲重明此義以偈頌曰

我於說事悉通達 凡二 諸漏有生皆滅除 十三
 望佛如來無分毫 大尊神變獨超世
 我取此界及諸山 以手迴轉亦摩抹
 彼時不動一衆生 我但有斯神通力
 三千世界諸水聚 此刹若見若不聞

我內彼水一指間 於諸衆生無損滅
 我於初夜天眼觀 何等衆生心疑惑
 求其善根及諸法 欲以神力爲決除
 我於如是生念時 不離本坐亦無往
 已爲宣說正道法 令彼得聞破心疑
 我於如是說法時 令萬四千住聖法
 三萬諸人護禁戒 六萬正信受三歸
 我復念彼初夜時 所出神通甚微妙
 觀過北方三萬界 見一佛刹名伏怨
 彼佛界中諸衆生 獨有一人深疑惑

我時不起現彼說 令彼各謂已獨聞
阿難我智正若此 如是神通佛自知
衆生若有疑惑者 但當決定請世尊
我今坐斯蓮華上 見一世尊般涅槃
彼佛處火就闍維 自外諸方亦皆爾
我心觀佛生希有 是不可測誰所爲
爲是世尊爲聲聞 而我見佛斯滅度
爾時阿難復如是念彼尊者羅睺羅世尊之
子於一切法已度彼岸有大威德具大神通
或時能作如斯大事我今亦當問其作不尊

者阿難作是念已即便白彼羅睺羅大德我
親從佛聞如是言我諸聲聞大弟子中持戒
第一則羅云其人也是不思議莊嚴神變將
非大德之所爲乎時羅睺羅答阿難曰阿難
世尊大悲普覆一切雖稱讚我持戒精進具
足神通然而今者所現神變事特非常不可
測度我從生來未嘗見覩亦未思惟又無分
別况復能爲如斯神變阿難是大莊嚴實非
我作所以者何我念往昔惟此三千大千世
界廣大若是所謂百億四天下百億日月百

民三

十四

億大海百億須彌山百億大鐵圍山如是及
餘黑山之類一切皆納一毛孔中當爾之時
我身如本衆生不異諸四天下所有大地須
彌諸山乃至大海及以衆流咸皆安隱無相
振觸一切無有逼迫損傷阿難我但有是自
在神力阿難我昔一時取此三千大千世界
所有大海及餘小海大河小河乃至陂池微
細水聚如是一切悉入毛孔當爾之時我身
無損衆生無害諸大海水及與河流乃至陂
池細微水聚各皆如本無相漂迫所居皆知

身在水中阿難我昔一時此處入禪既入定
已即於東北至一世界彼佛世尊號難勝威
如來應供等正覺明行足善逝世間解無上
士調御丈夫天人師佛世尊所現身禮敬敬
已即復還此世界^十維羅城淨飯王前求索
一掬栴檀末香得已還持於彼佛刹供養世
尊香氣徧滿時即為彼難勝威佛化作樓觀
象輦分明高萬由旬一切妙寶莊嚴間錯復
以天香為七寶蓋覆佛頂上高一萬億八千
由旬廣八千由旬又於彼界為一切衆生各

各化作梅檀樓觀象輦高百由旬廣五十由旬四柱方整隨意所樂令彼衆生備具莊嚴各皆自有無相障礙阿難我但如是究竟聲聞神通彼岸今此衆中若有於我生疑惑者任語世尊世尊雖處寂定尚當證知爾時羅睺羅欲重宣此義而說偈言

我曾取此三千界 百億四天與鐵圍
一切悉入毛孔中 阿難我有如斯力
此閻浮提如是大 彼彼各住不相知
一切皆入毛孔中 阿難是我神通力

此須彌山甚高廣 鐵圍衆山不隨宜
皆悉置一毛孔中 阿難知我神通力
彼等皆各無迫觸 而見入我一毛中
時我身體不覺疲 彼亦不知處毛道
三千大千諸水聚 衆流陂河及大海
一時吸之置毛孔 我但有是大神通
此界如是衆水聚 大海諸河及細流
彼等皆各不相知 而我能令入毛孔
阿難我此神通事 昔曾數現世尊前
此衆如有疑惑人 當問如來無礙眼

阿難我處大蓮華 見彼十方諸菩薩

捨施頭目及妻子 悉祈無上菩提尊

我見神變生希有 決謂世尊之所為

或不空見彌勒輩 亦或聲聞大弟子

爾時尊者羅睺羅作如是等師子吼時彼大

民三

十六

衆中有八十七億百千那由他諸天人等遠

塵難垢得法眼淨是諸天人得法證已以天

梅檀末香慇懃再三散於尊者羅睺羅上如

是供養已復發是言希有希有清淨佛子真

行大乘已於諸法種衆善根今能如是大師

子吼

佛說大方等大集菩薩念佛三昧經卷第三

音釋

獷古猛切 鎧苦亥切 涸下各切

佛說大方等大集菩薩念佛三昧經卷第四

隋天竺三藏達磨笈多譯

神變品之餘

爾時阿難復作是念彼尊者須菩提善修無諍行於一切法已到彼岸有大威德具足神

通或能為是不思議變我今應當問其作不代四

時彼阿難如是念已即復白彼須菩提言大德我親從佛聞如是說我諸聲聞大弟子中解空第一則須菩提其人也是不思議大莊嚴事將非大德之所作乎時須菩提答阿難

曰阿難世尊雖說我修無諍空行第一然是神通非我能作所以者何我念一時入於三昧如此三千大千世界弘廣若斯置一毛端往來旋轉如陶家輪當爾之時無一衆生有驚懼心亦不覺知己之所處阿難我念往昔於如來前欲作如是大師子吼白言世尊如此三千大千世界寬廣如是我能以口微氣一吹皆令散滅復令其中所有衆生不驚不迫無往來想阿難我於爾時在世尊前已曾示現如是神通阿難我念一時復於佛前作

師子吼白言世尊我今能以如此三千大千
世間其間所有一切衆生皆悉安置一指節
端上至有頂然後還來住於本處令彼衆生
寂然無聲不相逼迫無往返想阿難我念一
時宴坐三昧見彼東方現前則有六萬諸佛
如是南西北方四維上下無量無邊百千世
界各有六萬諸佛世尊昔所未見今皆見知
阿難我於彼時住閻浮提以是定心復發神
力至須彌頂天帝釋邊撮取一掬栴檀末香
徃彼無量諸世界中供養向時爾許如來應

供等正覺彼彼世界諸衆生等皆悉明了見
我住是閻浮提界供養承事彼諸世尊知我
是此娑婆世界釋迦牟尼如來應供等正覺
聲聞大弟子上座須菩提於空無諍三昧門
中最第一者阿難我到如是神通彼岸具足
成就神通波羅蜜阿難今此衆中若天若人
若梵若魔若沙門婆羅門等於我所說尚有
疑心彼若能問我師世尊今在寂定自當證
知爾時佛神力故於虛空中出大音聲命阿
難曰阿難如是如是如上座須菩提向師子

吼汝如是持時彼天人梵魔沙門婆羅門阿
脩羅等見聞是已身毛皆豎發希有心得未
曾有作如是言甚為希有實未曾覩如是大
事乃至世尊諸弟子等尚有如是勝妙神通
大威德力何況諸佛所有三昧神通境界而
可思量而可宣說爾時尊者須菩提見諸世
間天人梵魔沙門婆羅門生希有已為重明
此義以偈頌曰

我住禪定解脫門 無諍三昧最第一
我昔曾於世尊所 現神通力無有邊

我轉三千世界地 一切令入毛道中
如彼陶輪無窮已 衆生安然不覺往
我昔住於如來前 分散諸世及大地
時彼衆生無損減 以住如是神通門
我以此界及衆生 皆置掌中入有頂
乃至還下彼不覺^{此四} 一切咸是斯神通
我曾入定觀東方 見彼六萬諸世尊
南西北方亦如是 六萬如來無有闕
又彼四維及上下 諸佛亦足六十千
平等具相金色身 我以天香而徧散

令彼衆生悉知見 各言我有須菩提
亦令此界牟尼尊 聲聞禪中最第一
我今作此師子吼 時衆若疑當問佛
佛放大聲誠告曰 如是阿難汝受持
我滅衆生及我心 乃至佛想無遺行
無諍空行無倫比 我實住此三摩提

彌勒神通品第四

爾時彌勒菩薩作如是念今者世尊諸大聲
聞弟子衆輩有大威德具足神通各皆自陳
師子吼事如我今者亦應於此一切世間天

人梵魔沙門婆羅門諸大衆前少現菩薩神
通事耳時彼彌勒菩薩如是念已即告尊者
阿難曰我念昔曾於晨朝時著衣持鉢詣世
尊所頂禮佛足白言世尊我今欲入此王舍
成如法求食言已即行阿難我於今日復如
斯念今於誰家初施食者我要當令其人先
住阿耨多羅三藐三菩提然後方受斯人食
也阿難我時念已即入大城次第乞食至一
大姓婆羅門家於彼門下默然立住阿難時
彼大姓施婆羅門知我乞食見我默住即告

我言善來阿逸多聖者阿逸多今日何故自
屈臨此其有所須願取我食阿難我即告彼
婆羅門言大婆羅門汝今若能於阿耨多羅
三藐三菩提種善根者然後乃當受汝施食
阿難時婆羅門即答我言仁今若能持此食
分徧奉十方恒河沙等一切諸如來應供等
正覺者然後我當發阿耨多羅三藐三菩提
心盡力勤修諸菩薩行所以者何我亦先於
諸如來所種彼一切諸善根故阿難我時復
語婆羅門言大婆羅門汝今必能建立斯志

我當受食分布供養恒沙如來阿羅訶三藐
三佛陀無有疑也時婆羅門復語我言聖者
阿逸多但受我食分張奉獻恒沙如來我便
發誓亦如誓行阿難我復語彼婆羅門言大
婆羅門汝今審能發如斯誓如誓行者我取
汝食分散供養恒沙如來阿難彼婆羅門乃
至三反要我供養我亦慙懃令其發心也阿
難我時如是與婆羅門反覆周旋相約束已
然後告彼婆羅門言大婆羅門如汝言者速
將食來吾當為汝分布供養恒沙世尊阿難

時婆羅門聞我言已便授我食我既受已則於其前如彈指頃分布供養恒沙如來阿難我於爾時分布彼食供養恒沙諸世尊已然後還彼婆羅門家阿難時婆羅門見我如是無礙神通心生驚恠身毛皆豎然後歡喜踊躍無量即持種種上妙飲食奉施於我勸我飽食我時受已自恣食之彼婆羅門然後方持一切珍寶一切諸香一切衆華一切華鬘一切上妙諸瓔珞具與我相隨詣世尊所恭敬合掌頂禮佛足即於佛前發阿耨多羅三

藐三菩提心復作是願其有衆生聞我施此博食善根皆即住於不退轉地世尊若我此願必得成就阿耨多羅三藐三菩提者以此善根令我未來成菩提時亦有如是無量無邊諸聲聞衆皆是清淨大阿羅漢如今無異若我此誓真實不虛者以是因緣令此三千大千世界一切大地六種震動而彼大婆羅門發是願時佛神力故應時此間三千大千世界所有一切大地六種震動阿難今此衆中若天若人於我此事生疑心者世尊出時

應當諮問阿難我今未成阿耨多羅三藐三菩提已具如是大威德力到於一切神通彼岸阿難我念往昔無量無邊阿僧祇劫有佛世尊號曰然燈如來應供等正覺出現世間我時於彼然燈佛前獲得如是一切菩薩念佛三昧得三昧已諸方所有一切諸佛現說法者彼諸世尊常現在前又我得此三昧門已即於無量無邊劫中以此神通教化無量無邊衆生悉令住於阿耨多羅三藐三菩提中猶如今者王舍城中大婆羅門阿難復念

往昔於彼蓮華上如來應供等正覺所以一神通教化成熟彼三萬億百千衆生皆令住於阿耨多羅三藐三菩提中阿難我又曾於最上不退轉行佛世尊所得一三昧名曰普明得三昧已教化成熟六萬八千欲界諸天皆令發於阿耨多羅三藐三菩提心阿難當如是知菩薩摩訶薩一切皆有不可思議大神通力第一彼岸爾時彌勒菩薩摩訶薩爲重明此義而說頌曰
我曾晨朝整衣鉢 請問釋師教明行

於是頂禮辭如來 世尊我今將求食
 大師如是誡我曰 汝去當念利衆生
 我涅槃後汝成佛 諸種功德皆圓滿
 阿難我時如是念 未知今往前食所
 當於誰家初受食 我應教令住菩提
 我行乞食有所遇 遂逢大姓婆羅門
 以恭敬心稱善來 希有遠至阿逸多
 我今自悔仁來晚 惟願時坐受我食
 大士妙法難思議 我當奉上精美膳
 我時語彼婆羅門 汝能先發菩提意

利益天人大衆等 然後我方受汝食
 彼婆羅門復要我 汝阿逸多今若能
 以我此供恒沙尊 如是我發菩提志
 我便許彼婆羅門 汝於菩提慎莫退
 吾以汝供奉諸佛 終今汝身獲大果
 時婆羅門更誠誓 願為我奉諸如來
 諸佛勝尊若受者 我行菩提無疑惑
 彼婆羅門信我言 發誠至心授我食
 我持彼供恒沙尊 今婆羅門須臾見
 彼既覩我大神通 或驚或喜增珍饈

我於蓮華上佛所	百僧祇劫諸所作	若人住此三昧中	我登得見十方佛	昔於然燈世尊所	彼名菩薩念諸佛	我昔在於然燈前	若有菩薩得聞者	時婆羅門發心已	供養我畢至佛所
得三昧故現神通	皆為利益諸衆生	能現無邊諸神變	以彼威德故能觀	受此勝念三昧時	能與妙樂難稱量	得此微妙勝三昧	彼於世界速成佛	復廣弘誓不思議	便發無上菩提心

爾時衆中梵魔沙門婆羅門天人阿脩羅一	欲拔衆生出苦海	若人欲見諸世尊	以此神通自在力	阿難如是大神通	月上佛時住勝禪	我於最上行佛所	所得三昧實端正	我又最上如來前	滿足七萬諸衆生
是人應學斯妙定	欲轉無上妙法輪	我所修見諸如來	皆於往昔得成就	迦葉佛前獲深定	受一三昧名普明	能施深樂難稱量	於彼精勤修梵行	皆因我住菩提道	

切世間得聞彌勒菩薩摩訶薩師子吼時皆
大歡喜生竒特心歎未曾有

歎佛妙音勝辯品第五

爾時不空見菩薩摩訶薩觀諸大衆天人梵
魔沙門婆羅門諸龍夜叉乾闥婆阿脩羅等

得未曾有生竒特心尺四或時驚怖身毛皆豎見

是事故一心安詳從三昧起已即告尊者阿

難言大德善哉善哉諸佛世尊甚為希有甚

為希有所以者何諸如來應供等正覺乃至

能有大慈大悲具足無量諸功德等阿難諸

如來應供等正覺能證如是阿耨多羅三藐
三菩提時覺一切法無有生故見一切法無
有作故知一切法不可得故然後於彼波羅
柰城古仙住處鹿苑林中三轉十二行無上
妙法輪而是法輪初未曾見一切世間若梵
若魔若天若人若沙門婆羅門有能如法為
斯轉者何等名為三轉法輪云何復稱十二
行也所謂此是苦此是集此苦滅此苦滅道
乃至此苦已知此集已斷此滅已證此道已
修是為三轉如是三轉得名為十二行也又

此為八聖道分是中有無量文字無量名句
無量言音無量義趣無量解釋然說斯義為
開示故為論義故為分別故為顯示深義故
為易知故為具足故時彼不空見菩薩摩訶
薩復告尊者阿難言阿難是故我言諸佛世
尊甚為希有諸如來應供等正覺有大慈悲
具足功德諸佛世尊既證得阿耨多羅三藐
三菩提已然後為諸聲聞眾等於彼無教法
中以教說故無言法中以言說故無相法中
以相說故無證得中教令證得彼法雖無語

言可說相貌可得而諸智者皆已覺悟諸賢
善人亦得證知諸阿羅漢咸得解脫於彼無
始生死中也復次阿難譬如有人持一束草
言欲堰塞恒河大流於意云何彼人如是其
事可乎阿難答曰不也大士何以故彼人所
作世間本無何論可不空見言如是阿難
如來應供等正覺為諸聲聞於無言法更以
言宣無名相中以名相說其事若此復次阿
難譬如有人本無口舌欲以一音徧諸世界
咸得聞知於意云何彼人所作其事可乎阿

難答曰不也大士何以故彼人所作世間本無何論可不空見言如是阿難如來應供等正覺為諸聲聞無言說中更以言宣無名相法以名相說其事亦爾復次阿難譬如有人手持彩筆欲畫虛空望成文字於意云何彼人所作可成就乎阿難答曰不也大士彼人所作世間亦無何問成不空見言如是阿難如來應供等正覺為諸聲聞無言法中更以言宣無名相法以名相說其事若此復次阿難譬如有人先無手足呪術技能而大

唱言我能擔負須彌山王於意云何彼人所作其可遂乎阿難答曰不也大士是人所作世間既無何問可不空見言如是阿難如來應供等正覺為諸聲聞無言法中更以言宣無名相法以名相說其義亦爾復次阿難亦如有人至大海際或取一板或持小筏或欲身涉或欲身浮廣施方便發如是言我度大海登陟彼岸於意云何彼人所作為可爾乎阿難答言不也大士一切世間本無斯事何云可不空見言如是阿難如來應供等

正覺為諸聲聞無言說中更以言宣無名相
法以名相說其義若此爾時不空見菩薩摩
訶薩為重明此義以偈頌曰

諸佛大慈難思議 常以悲光照一切
於無量億那由他 正覺如是深法門
諸法本性無生處 因緣集會往來空
無上天師雖善宣 然彼自性常寂滅
諸佛正法難稱量 世尊慈愛故宣演
能開如是難見法 利益世間諸天人
不可說法難值聞 十力雄猛能廣說

顯示最上清涼道 安隱世間天人眾
世尊巧說無相法 無師自然能覺知
破壞一切諸外道 凡愚莫知此實際
諸佛智海難測量 宣說法界亦無盡
一切聲聞同已證 開示轉戀不思議
如人把草塞恒河四 尊者我謂不為難十一
正覺轉彼無生輪 我持此事難於彼
若人手執五色筆 種種眾彩畫虛空
無語言中置語言 我持此事難於彼
若人無手亦無足 求負須彌度大海

無相法中轉相輪 我謂此事難於彼
若人無舌復無口 一音徧滿恒沙界
無證法中能令證 我謂斯事難於彼
爾時尊者不空見菩薩摩訶薩告阿難言尊
者諸佛如來應供等正覺甚為希有能於無
量阿僧祇劫覺了通達一切諸法究竟彼岸
號佛世尊然諸如來應供等正覺隨順衆生
諸根差別樂欲所應微妙圓音自然而出普
為宣說種種句門所謂若諸衆生樂行布施
如來則為讚說檀波羅蜜彼亦隨念世尊為

我宣說施法有諸衆生樂修禁戒如來則為
讚說尸波羅蜜彼復生念世尊為我宣說戒
法有時衆生樂行忍辱如來則為讚說彞提
波羅蜜彼亦生念世尊為我宣說忍法有時
衆生樂行精進如來則為讚說毗梨耶波羅
蜜彼亦生念世尊為我宣說精進或時衆生
樂習禪定如來則為讚說禪波羅蜜彼亦生
念世尊為我宣說禪法或時衆生樂求智慧
如來則為讚說般若波羅蜜彼亦生念世尊
為我宣說智慧

或時衆生樂求解脫如來則爲讚說解脫彼亦生念世尊爲我宣說解脫或時衆生樂修解脫知見如來則爲讚說解脫知見彼亦生念世尊爲我宣說解脫知見有諸衆生樂修無常如來則爲讚說無常彼亦生念世尊爲我宣說無常有諸衆生樂修苦者如來則爲讚說衆苦彼亦生念世尊爲我宣說苦法有諸衆生樂修無我如來則爲讚說無我彼亦生念世尊爲我宣無我法有諸衆生樂修空寂如來則爲讚說空法彼亦生念世尊爲我

宣說空法

有諸衆生樂修不淨如來則爲讚說不淨彼亦生念世尊爲我宣說不淨有諸衆生樂欲生天如來則爲說生天法彼亦生念世尊爲我說生天法尊者乃至有諸衆生樂種種法如來則爲說種種法彼亦生念世尊爲我說種種法爾時不空見菩薩欲重明此義而說偈言

諸佛世尊具圓音 隨衆生類自然出
彼之意樂所欲聞 如來隨順說發起

或有衆生樂布施	如來則為讚檀度
或有衆生樂持戒	如來復為讚尸羅
或有衆生樂忍辱	如來則為讚羸提
若彼衆生樂精進	如來為讚毗梨耶
或有衆生樂三昧	如來則為說禪定
若彼衆生樂智慧	如來則為讚般若
若彼衆生樂解脫	如來亦為讚解脫
若彼衆生修無常	即令聞彼無常法
彼若樂聞苦不淨	亦令聞苦不淨音
彼若樂聞空無我	不思議音讚空寂

彼若樂聞緣覺乘 世師妙音說緣覺
 彼若樂聞諸佛乘 兩足尊讚菩提道
 乃至彼樂生天宮 音中亦顯生天事
 如是妙音難思議 隨諸類感便應現
 彼等既聞清淨音 其誰不趣菩提道

爾時不空見菩薩摩訶薩復告尊者阿難言
 阿難諸佛世尊殊特希有如來應供等正覺
 能有如是熾然善根所以者何諸佛世尊從
 久遠來乃能供養無量無邊過恒沙數諸如
 來等又復常行施忍精進諸事所謂捐捨身

命頭目髓腦難作能作種種苦行調伏身心
然後方證阿耨多羅三藐三菩提證菩提已
則能具足無量辯才為他說法云何辯才謂
不思議辯才無上辯才無勝辯才無取著辯
才妙解脫辯才無障礙辯才善和合辯才相
應辯才熾盛辯才無有問辯才豫知辯才作
相辯才無作相辯才靜默然辯才不怯弱辯
才除恚辯才種種文字莊嚴辯才種種詞句
莊嚴辯才義句莊嚴辯才甚深句莊嚴辯才
顯現深義辯才於深示淺易知辯才無邊譬

喻辯才捷疾辯才善決疑辯才成就無餘辯
才能問辯才略問廣答辯才利益辯才無毀
辯才善思量辯才無蹇蹇辯才無恥辱辯才
具足成就離謗辯才具足成就智人所讚辯
才具足無畏心辯才具足不狹劣辯才具足
不錯文句辯才具足不忘辯才具足無失辯
才具足隨心說法十四辯才具足知他至心為說
辯才具足開發無穢濁辯才具足莊嚴音句
能說辯才具足能說過去辯才具足能說未
來辯才具足能說現在辯才具足聖者辯才

具足知無生妙智辯才具足能令一切衆生	歡喜辯才爾時不空見菩薩摩訶薩重宣此	義而說偈言	供養最勝尊	世間大導師	無饜復無礙	尊勝無上人	種種深密教	妙音難可量	不思無能壞
無數無邊量	廣集諸善根	無量亦無邊	善說斷疑網	清淨咸相應	和合解脫義	隨問皆能釋	具足莊嚴辯	決了法安住	亦無懼畏心
能證無上道	得彼難思辯	妙音與智俱							

不驚不毀損	無錯莊嚴句	安樂無忘失
不感於諸方	無滓致心淨	過去與當來
現在無罣礙	凡聖平等轉	辯才非他心
近遠同時聞	佛音說時出	海水可知量
毛滴可知數	諸佛大名稱	辯才難得邊
虛空可盡邊	須彌易稱量	無上天人師
辯才深難測		

佛說大方等大集菩薩念佛三昧經卷第四

佛說大方等大集菩薩念佛三昧經卷第五

隋天竺三藏達磨笈多譯

歎佛妙音勝辯品之餘

爾時不空見菩薩摩訶薩復告尊者阿難言
阿難諸佛世尊是大梵聲是大師子聲是大

雄朗聲是大龍王聲是大妙鼓聲是大妙歌

民五

聲是妙好聲是大風聲是大雲聲是大雷聲
等阿難諸佛世尊是大善聲不思議聲是無
量聲是無邊聲是不可稱聲是滿足聲是無
礙聲是迦陵頻伽聲阿難諸佛如來是圓滿

聲諸如來是可證聲諸如來是可知聲諸如
來是深遠智聲諸如來是不可壞清聲諸如
來是無垢聲諸如來是無譏訶聲諸如來是
無斃破聲諸如來是妙好聲諸如來是最上
妙好聲諸如來是無缺聲諸如來是不怯弱
聲諸如來是具足一切功德聲阿難諸佛如
來應供等正覺出音聲時若欲一音徧滿一
佛世界即能徧滿若欲徧滿二佛世界若三
若四若五若十乃至百千世界乃至億那由
他乃至無量無邊阿僧祇不可數知世界如

來世尊還出如是無量無邊阿僧祇不可數
不可知殊異聲音皆悉充滿彼諸世界令彼
衆生諸有得聞如來聲者咸作是念今者世
尊獨爲我轉如斯法輪阿難諸佛世尊有如
是等不思議聲阿難諸佛世尊有如聲如
是利益尊者阿難譬如日輪爲閻浮提諸衆
生輩有眼目者作大利益云何利益所謂光
明照了一切如是阿難諸如來應供等正覺
清淨聲輪凡所至處能爲一切信根衆生隨
宜宣說作大利益其義亦爾復次阿難譬如

秋月十五日夜彼月光輪清淨圓滿閻浮提
人見者歡喜如是阿難諸如來應供等正覺
圓滿聲輪能爲一切法音光明聞者歡喜得
大利益其義亦爾復次阿難譬如大海水平
等一味常住澹然難入難度其間多有諸異
珍寶而能爲彼一切衆生若人非人作大饒
益如是阿難諸如來應供等正覺圓音平等
一味湛然難入難測微妙而能安樂一切衆
生其義亦爾復次阿難譬如大地任持一切
山林河海王都大城民人聚落復能生長諸

種苗稼根莖華果饒益安樂一切衆生如是
阿難諸如來應供等正覺普載聲輪任持一
切令無壞損復能生長衆生善根功德華果
饒益世間其義亦爾復次阿難譬如虛空容
受一切能令衆生種種興作往來遊處爲大
利益如是阿難諸如來應供等正覺廣大聲
輪徧滿一切能令衆生多有所作受用去來
無不利益其義亦爾復次阿難譬如三十三
天波利質多羅樹其華敷時能令三十三天
皆生歡喜多受適樂如是阿難諸如來應供

等正覺開發聲輪能爲一切啓甘露門令諸
衆生等證常樂其義亦爾爾時不空見菩薩
摩訶薩爲重明此義以偈頌曰

世尊真善大梵音 師子妙音牛王吼
最上龍吼滿世界 器度雄朗丈夫聲

雲雷風等弘壯聲 彼不思議悉無量

轉行十方無邊界 所至無礙皆悉聞
如來出聲甚圓備 世間未能障其聲
亦如迦陵頻伽音 所聞清婉甚微妙
聖不望報生物喜 教令證此最勝聲

解脫深句無有比 世間無有能毀壞
不破不缺微妙聲 相續不斷和合出
救護世間無窮已 具足一切功德音
調伏丈夫如意聲 其聲徧聞於三界
彼諸衆生斯念喜 各言爲我宣妙聲
若欲聲滿一世界 若二三四及與五
若十二十至五十 百千億數復過前
若復過彼恒沙土 皆能充滿一切刹
令彼衆生無異心 咸作是念但爲我
譬如日輪出現時 能爲閻浮作明導

如是世尊天人師 法聲光明照世間
猶如秋月處衆星 其輪圓滿異明淨
彼爲閻浮興大利 衆生覩見皆歡喜
世尊如是滿月聲 不思議淨勝世間
其有聞者心無厭 爲諸衆生作饒益
猶如大海水湛然 深廣無邊難得底
其間常出衆異寶 爲諸世間作利益
如是諸佛大名稱 其聲深遠亦難窮
恒教證彼清淨音 與不可壞一切樂
若此三千諸大地 能持異類諸衆生

如是諸佛普載聲 生成一切衆饒益
 譬如虛空能容受 飛鳥群生皆獲益
 如是足尊廣納音 恒以勝善利衆生
 猶如忉利質多羅 華時已樂彼諸天
 如是諸佛甘露音 能爲衆生畢竟利
 尊者設我滿一劫 或復百劫讚其聲
 生生弗能得其邊 佛不思議聲若是
 假令十方諸衆生 各各咨口長歌歎
 終亦莫能致少分 佛音如是難思議
 假使行住諸衆生 或於一時皆成佛

彼諸佛說亦無盡 佛聲如是難思議
 世尊如是衆妙音 莊嚴具足無倫匹
 若人但能生喜心 彼等終無惡道畏
 佛音如是難思議 第一微妙無可比
 若有菩薩得斯喜 不久則成佛法王
 爾時四天王天主帝釋須夜摩天王兜率陀
 天王化樂天王他化自在天王魔王之息導
 師太子娑婆世界主大梵天王乃至淨居天
 王及餘一切大威德諸天與欲色界中復有
 無量諸天子等聞不空見菩薩摩訶薩稱讚

世尊音聲功德已一切皆於不空見所起尊
重心歡喜踊躍不能自持咸以天妙栴檀末
香天華及鬘天妙衣服寶蓋幢幡雜色彫彩
施散懸置於不空見菩薩摩訶薩上時會衆
中有六萬億那由他百千欲色界天聞說如

六五

五

來音聲功德爲當得故發阿耨多羅三藐三
菩提心種諸善根復有五千比丘被精進鎧
於阿耨多羅三藐三菩提種諸善根復有七
百千萬諸比丘尼發阿耨多羅三藐三菩提
心及弘誓願復有百千優婆塞皆從彼寶蓮

華座起直詣不空見菩薩摩訶薩所復有二
億那由他百千女人各解自身衆寶瓔珞散
擲虛空住於不空見菩薩摩訶薩上皆於阿
耨多羅三藐三菩提種諸善根
讚如來功德品第六

爾時不空見菩薩摩訶薩復告尊者阿難言
阿難諸佛世尊甚爲希有諸如來功德具足
故自天降下具足故入胎具足故住胎具足
故出胎具足故母生具足故善根具足故衆
相具足故衆好具足故莊嚴具足故出家具

足故入定具足故大人定具足故深心具足
故至心具足故真信具足故無畏具足故戒
身具足故定身具足故慧身具足故解脫身
具足故解脫知見身具足故諸通具足故證
智具足故至一切證知第一彼岸故至慈大
慈第一彼岸故至悲大悲第一彼岸故至喜
大喜第一彼岸故至捨大捨第一彼岸故至
最勝無等第一彼岸故至諸威德第一彼岸
故至諸神通第一彼岸故至一切諸法無礙
第一彼岸故至是處非處力第一彼岸故至

諸開導利益第一彼岸故至奢摩他毗婆舍
那第一彼岸故至一切禪定解脫三摩跋提
第一彼岸故至無貪無瞋無癡無慢無放逸
無嫉妬無恚捨離諸過解脫五道至四無畏
第一彼岸故令一切衆生種諸善根受業果
報教論發起第一彼岸故令一切衆生諸戒
行聚不破不缺不漏不雜成丈夫志無所觸
犯智者所讚無有過愆一切世間若天若人
若梵若魔沙門婆羅門乃至無能如法呵責
非理毀者阿難諸佛世尊功德殊勝一切世

間衆生類中乃至無有能得測量宣說如來
戒等功德知其少分何處有人復能過者阿
難汝等從今當如斯觀此虛空界如是廣大
此四方界如是弘寬我皆了知限量邊際諸
佛功德不可測量如是阿難諸佛世尊所有
戒聚所有定聚所有慧聚及解脫聚解脫知
見聚乃至一切威儀神通利益無礙不可宣
說不可顯示不可得知不可得入所以者何
阿難諸佛世尊所有功德皆無有邊何以故
諸佛世尊有無量戒行有無量定行有無量

慧行有無量解脫行有無量解脫知見乃至
有無量諸功德悉等是故阿難當知諸佛世
尊具足若此爾時不空見菩薩摩訶薩為重
明此義以偈頌曰

世尊天降入胎時

住不思議出亦爾

生家最勝母無比

最上第一諸功德

體備衆相三十二

諸好具足莊嚴身

諸佛所作不思議

皆緣曠劫久修集

人中勝上求出家

成就禪定大三昧

正心淳信斯堅固

一切方便無不知

戒行三昧皆具足
智慧成滿無倫比
解脫知見亦已獲
神通威德彼岸邊
能滅熾苦救衆生
慈悲要行最爲首
喜捨亦妙行平等
諸佛世尊自證知
身口常與意行合
所行隨智難思量
威儀無比超世間
法王神方到彼岸
無諍三昧見法如
是處非處皆明了
禪定解脫難測度
普能饒益諸衆生
定慧止觀斯成就
光明徧覺滅垢心
無有貪恚衆過愆
解脫無畏皆善學

戒行無破亦無羸
無濁無雜盡清淨
多衆生觸不瞋惱
不求果報智所稱
內無過失外無毀
假使天人及梵魔
或復沙門婆羅門
莫能譏訶常清淨
虛空猶可盡其界
諸方亦可極其邊
無上調御天人師
清淨戒行孰能測
大海可以口虛乾
無邊水聚亦復爾
諸佛光明不可識
清淨戒行誰得邊
須彌可以口吹散
大小鐵圍亦復然
諸佛妙行不可知
清淨戒行難得底

爾時不空見菩薩摩訶薩作是思惟今者如來應供等正覺若降威神俯臨斯會可謂善哉今我亦當爲諸菩薩摩訶薩故請問世尊一切菩薩念佛三昧微妙法門如來先已顯示其名今者當應爲諸弟子演說斯法宣明義理世尊寧當過安禪寂乎爾時世尊知彼不空見菩薩摩訶薩如是念已佛神力故應時此會三千大千世界大地六種震動所謂動涌起震吼覺等如是具足十八相動乃至涌沒如是動已時佛世尊復以神力放大光

明照此三千大千世界彼光出時能令一切星宿天宮月天子宮日天子宮乃至欲界諸天宮殿所有光明喪滅不現復有如是無量無邊不可思議阿僧祇恒河沙數諸梵天宮所有威光悉皆闇晦乃至色界一切天宮蒙佛光故亦皆不現諸光沒已惟佛世尊神光獨盛爾時世尊大慈熏心爲欲饒益諸衆生故從禪定起安詳徐步詣彼大衆周旋觀察是不空見菩薩摩訶薩等已於是一切世間諸天及人若梵若魔沙門婆羅門諸龍夜叉

阿脩羅輩遇佛光明咸各自彼蓮華座起前
詣佛所曲躬合掌禮敬世尊各還退坐爾時
不空見菩薩摩訶薩遙見世尊身相分明端
嚴殊特諸根寂靜如調象王心意朗然若澄
淨水一切種具足一切智圓滿自彼而來深
生喜已於是不空見菩薩即告尊者阿難言
阿難汝觀世尊從禪定起如來世尊從靜室
來必當開演第一誠諦終無虛妄如來世尊
是妙語者是眞語者是實語者是如語者是
不異語者是善語者心善思惟常行善事身

業無失口業無失意業無失一切功德斯皆
具足所謂具足最上第一戒聚故具足最上
第一定聚故具足最上第一實慧聚故具足
最上第一解脫聚故具足最上第一解脫知
見聚故具足最上第一威儀故具足最上第
一神通故具足最上第一利益故具足最上
第一不思議辯才故具足最上第一成就故
具足最上第一微妙故具足最上第一無退
故具足最上第一入胎故具足最上第一住
胎故具足最上第一生家故具足最上第一

圓滿功德故具足最上第一不思議諸相故
具足最上第一不思議諸好故具足最上第
一過去業故具足最上第一善根故具足最
上第一具足發心故具足信心故具足破煩
惱故具足大破煩惱故具足捨家故具足知
五種故所謂具足第一戒身故具足第一定
身故具足第一慧身故具足第一解脫身故
具足第一解脫知見身故已到第一神通彼
岸故已到第一無餘智證彼岸故已到第一
分別法彼岸故已到第一分別義彼岸故已

到第一分別辯才彼岸故已到第一寂靜定
彼岸故已到第一明達彼岸故已到第一根
力覺道彼岸故已到第一慈及大慈彼岸故
已到第一悲及大悲彼岸故已到第一喜及
大喜彼岸故已到第一捨及大捨彼岸故已
到第一不思議威儀彼岸故已到第一慚愧
彼岸故已到第一於一切法自在彼岸故已
到第一過去智知見無礙彼岸故已到第一
未來智知見無礙彼岸故已到第一現在智
知見無礙彼岸故已到第一身業隨智慧行

彼岸故已到第一口業隨智慧行彼岸故已到第一意業隨智慧行彼岸故阿難如來應供等正覺於一念中能具足知一切衆生心所行若善若惡若淨若垢等爾時不空見菩薩摩訶薩復告尊者阿難言尊者阿難諸佛世尊如大海淨戒聚不可得底故尊者阿難諸佛世尊如須彌山三昧聚不可動搖故尊者阿難諸佛世尊如虛空智慧聚無有邊故尊者阿難諸佛世尊如虛空攝一切衆生無障礙故尊者阿難諸佛世尊如日輪爲諸

世間作法光明故尊者阿難諸佛世尊如火聚焚燒一切衆生諸煩惱薪故尊者阿難諸佛世尊如河如陂如池如泉洗盪衆生老病死垢故尊者阿難諸佛世尊如良醫能愈一切衆生諸疫病苦故尊者阿難諸佛世尊如大雲雨能以法水潤澤衆生枯槁故尊者阿難諸佛世尊如師子王能破一切衆生大我慢故尊者阿難諸佛世尊如大船能度衆生生死河故尊者阿難諸佛世尊如那羅延能伏一切世間大力故尊者阿難諸佛世

尊如優曇華一切世間難得見故尊者阿難
諸佛世尊如波利質多樹華三十二大人相
可愛樂故尊者阿難諸佛世尊如父母能與
一切衆生安樂利益故尊者阿難諸佛世尊
作利益安樂能令一切衆生得住故尊者阿
難若人說言如來出世有無量辯才如是說
者是則名為善說如來如來出世有不思議
辯才是名善說尊者阿難乃至如是略說如
來出世有無邊辯才如來出世有無礙辯才
如來出世有無取著辯才如來出世有勝解

脫辯才如來出世有隨順義辯才相應義辯
才微妙淨辯才巧問辯才不問辯才上辯才
無上辯才慈辯才大慈辯才悲辯才大悲辯
才喜辯才大喜辯才捨辯才大捨辯才佛出
世利益辯才尊者阿難若人說言如來出世
具足利益一切衆生是則名為善說如來尊
者阿難若人正言同義辯才利益衆生是則
如來出於世間又說若言彼利益辯才爲一
切衆生得利益故當正言音悉令具足是則
如來出於世間斯人亦名善說如來尊者阿

難若人說言彼無歸衆生無依衆生無救衆
生無護衆生無憐愍衆生如來出世爲歸爲
依爲救爲護爲憐愍者是則名爲善說如來
尊者阿難假使我今若經一劫若減一劫長
時歌讚諸佛世尊辯才功德終不得一又復
經於無量劫數具足演說如來應供等正覺
辯才功德終亦不得其少分邊尊者阿難譬
如有人老病羸瘠至大衆中發如是言諸人
當知我雖年邁爲病所摧而猶能以一毛端
勺滴取大海令即乾枯是人素無神通呪術

而能如是果決壯言尊者於意云何彼人言
義可取信不阿難答曰無也大士不空見復
言尊者彼人之言一切世間諸天及人頗曾
驚歎此事希有如是困人能以毛端盡大海
水如斯念不阿難答曰不也大士如是尊者
此事本無依何取信我今讚說諸佛世尊辯
才功德不得少邊其事若此尊者阿難且置
斯事假使佛今還自讚說毛分功德過億百
千那由他劫亦不能盡而況餘人尊者阿難
且置斯事我今更說假使大地所有一切衆

生若干種類有足無足二足四足乃至多足
 有色無色有想無想非有想非無想如此世
 界及以十方無量無邊諸世界中所有衆生
 設使盡皆一時成佛彼諸世尊經無量劫皆
 還歎佛一毛功德終亦不盡尊者阿難當知
 一切諸佛世尊乃有如是不可思議具足功
 德爾時不空見菩薩摩訶薩為重明此義以
 偈頌曰

尊者當觀法王來 一切世間應供養
 功德威光殊顯赫 一切智滿難可傾

最上妙言佛真說	實語及如無異言
善說聖法真實知	身口離過意亦爾
心無異念絕分別	戒行最勝三昧深
智慧解脫悉超倫	解脫知見無可比
威儀具足不思議	無上神通如實智
利益世間無有量	辯才妙行亦無類
降天下生象牛王	入胎成就世中勝
住胎殊異無有等	家生具足母尊高
成就衆根最第一	勝相圓滿不思議
妙好咸備極莊嚴	一切分明世瞻仰

具足真心信清淨	放捨世欲樂出家	已度神通第一岸	及奢摩他毗舍那	大海之水廣且深	調御丈夫清淨戒	須彌雖固猶可動	諸佛初住定禪時	虛空容有得其邊	終無能見正覺境
禪定除垢有大威	菩提成就得五種	智慧無礙亦無邊	法王通達斯自在	其或可以毛端測	雖經曠劫不能知	以手投擲至梵宮	已自無能動亂者	四方亦可知其限	思惟分別此彼處

尊者大地實弘廣	捨離煩惱人中尊	如日輪光破衆闇	如是自在世間師	猶如秋月出重雲	法王智光如滿月	冥寂長夜如明燈	世間智者能除闇	能設法炬自在尊	一切諸有皆滅盡
然可以指徧度量	彼心意識不可盡	觀諸善惡若見色	能破巨黑無明雲	衆生見者皆歡喜	如覩妙色無不樂	爲諸眼目作光導	恆以法光照衆生	天人大師爲他作	是故稱佛光明王

聖智如河及泉水	能盪生老病死塵
如太醫王施良藥	調御能除衆疾苦
猶如龍王降大雨	能滿一切諸大地
諸佛如是行慈悲	充足一切樂法者
大師子王震吼時	降伏世間諸惡獸
世尊如斯決定說	破除外道我慢心
如大舟船常往返	濟度一切諸去來
諸佛如是徧周旋	拔彼常沒四流者
優曇鉢華世希有	此閻浮提最難見
天人世尊難中難	一切世間歸依處

如波利樹華現時 三十三天甚愛樂
大人相好出與世 衆生覩見悉歡喜
世尊神變難窮盡 如我今者請宣說
我以歎佛諸功德 畢竟利益諸群生
佛說大方等大集菩薩念佛三昧經卷第五

佛說大方等大集菩薩念佛三昧經卷第六

隋天竺三藏達磨笈多譯

佛作神通品第七

爾時世尊自袈裟內出金色手摩彼不空見
菩薩摩訶薩頂復出廣長舌相印告不空見
菩薩言善哉善哉汝不空見汝今乃能為諸
衆生如是歎說如來應供等正覺真實功德
也不空見若有說言世間衆生無救護時是
中必有能救護者出現世間為作救護不空
見當知即是善說如來也復次不空見若復

說言世間衆生無歸趣時是時必有不思議
辯才無量辯才出現於世能與衆生作大歸
依不空見當知即是善說如來也復次不空
見若復說言世間衆生多貪欲行多瞋恚行
多愚癡行是時必有無欲恚癡大師出世為
除三毒不空見當知即是善說如來也復次
不空見若復說言世間衆生多慳吝時多嫉
妬時是時必有遠離慳嫉好行布施大師出
興為破慳嫉不空見當知即是善說如來也
復次不空見若復說言世間衆生無有慚愧

羞恥之行是時必有慚愧羞恥大師出世除
無慚恥不空見當知即是善說如來也復次
不空見若復說言世間衆生多行憍慢貢高
之事是時必有和敬調柔大師出世爲除憍
慢不空見當知即是善說如來也復次不空
見若復說言世間衆生無有慈悲不能喜捨
多行瞋恚穢濁毒心是時必有斷除瞋毒具
足四等導師出世教修慈悲大利益事不空
見當知即是善說如來也復次不空見若復
說言世若多惡無善衆生其有能教令生善

根先有善根令其增廣如是利益大師出與
不空見當知則是善說如來也復次不空見
若復說言五濁惡世衆生病增世有大人能
行利益導以出法安樂衆生不空見當知是
言則謂我也所以者何吾今出於五濁惡世
宣揚妙法斷除邪垢能多利益諸衆生故爾
時世尊手摩不空見菩薩頂時即以神力於
一念間令此大衆咸見東方無量無邊不可
說阿僧祇現在一切諸佛國土彼國土中諸
佛世尊未滅度者及彼衆生一切境界皆悉

坑前亦聞彼佛說法音聲亦見彼刹清淨莊嚴種種具足如是乃至南西北方四維上下十方所有諸佛淨土一切境界明了現前若觀掌中菴摩勒果又復世尊以手摩彼不空見菩薩摩訶薩頂時以佛神力及不空見本願因緣於一念間即見十方無量無邊阿僧祇不可數過去諸佛入涅槃者乃至彼刹清淨莊嚴了了分明若觀手掌又蒙佛力亦見當來諸佛世尊清淨刹土莊嚴具足爾時不空見菩薩摩訶薩以本願力承佛威神盡見

十方三世諸佛及彼佛刹清淨莊嚴已爲重宣此義即從座起正持威儀偏袒右肩右膝著地合掌向佛以偈頌曰

三千世界所有水 若人欲量皆可知
 調御丈夫天人師 戒行深遠孰能測

須彌高廣最巍巍 羸老病人口吹散

世尊初入於禪定 億百千劫難可了

虛空足量能盡邊 四方亦可步其際

世尊大師等正覺 智慧甚深無淨底

虛空平等無罣礙 可爲暴風所飄動

如來本性無煩惱	貪恚癡毒何所居
日輪圓滿處空中	清淨光明徧世界
如是阿羅仙種姓	於此天衆而曜暉
又如秋月合昴宿	威光超世挺衆星
如是滿月大法王	焰赫獨出天人上
若優曇華甚希有	時乃一遇不出世
諸天中天調御師	有時而現隨意感
世尊妙手摩我頂	金色百福相莊嚴
不可毀壞悉具足	其爲利益斯若是
世尊真言及實語	人中法王轉正輪

普徧十方世界中	甚爲利益悉自在
蒙世尊手摩頂時	我見十方最上人
如恒河中說沙數	大威德仙衆多彼
大牟尼尊手加我	即見諸佛如彌陀
猶恒河中算沙數	人中最勝衆多彼
如來慈手親摩覺	極樂世界我見知
阿闍應供兩足尊	大悲光明作饒益
我蒙世尊神手觸	盡見世間滅度尊
於一念頃如恒沙	大慈降伏諸根者
世尊以手摩我時	亦觀彌勒昔諸願

如彼當來一切事 了了明白無復疑
 過去諸佛我已見 未來現在亦復然
 十方三世諸如來 神通德力難稱說
 世尊以手摩我時 普見十方救世者
 并觀諸佛清淨刹 我因更發最上願
 諸佛神通難思議 凡六 戒定智慧亦如是
 諸餘功德不可說 惟願如今常教示
 如來下手摩我時 即見十方諸塔廟
 衆寶金色如恒沙 具足種種微妙供
 諸佛皆具大名稱 彼彼相好充十方

百千樂音以供養 我見彼刹悉如是
 彼刹復有諸佛塔 金縷間錯寶瓊瓔
 高大過於一由旬 端正莊嚴皆若此
 復見大尊諸塔廟 衆寶雜廁甚精華
 亦有住於虛空中 常以天華散其上
 我復見彼諸勝塔 涌出高滿十二旬
 彼諸佛所名燈然 光明徧照十方刹
 世尊以手摩頂時 我見妙塔不可說
 彼佛各有大名稱 其間皆悉如來力
 世尊手摩我頂時 於是得見諸佛刹

彼或燒身或受辱	種種行類不可宣
各於自刹修苦行	無有晝夜如救然
勇猛弘誓度衆生	皆為無上菩提故
我又覩見十方刹	有諸菩薩常辛勤
自剗身肉然多燈	彼為菩提光明故
我又復見清淨身	於諸佛前常立住
至彼世尊涅槃已	為求菩提大德故
我又復見為法人	香油灌身然燈炬
苦身精意徧十方	終不繫心財食類
我又更見諸丈夫	恒捨頭目及身手

妻子王位與國城	悉令群生獲安樂
如我所見無遺餘	不可口言而宣說
我所知見最勝等	蒙佛威靈故徧觀
世尊威神加持故	令我見斯希有事
吉祥第一天中天	我今歸依最無上
見無邊佛廣請問品第八	
爾時不空見菩薩摩訶薩白佛言世尊今此	
一切天人大衆既見世尊久處禪定默無言	
說咸生渴仰惟願世尊俯就斯座爾時世尊	
聞不空見菩薩摩訶薩為彼天人大衆請已	

端身正念默然許之爾時不空見菩薩既蒙
默許偏袒右臂右膝著地合掌向佛復白佛
言世尊我今欲問若聖聽者乃敢發言佛告
不空見如來應供等正覺隨汝所問當為汝
說斷汝所疑令爾心喜然是天人梵魔沙門
婆羅門等皆當證知時不空見菩薩摩訶薩
承佛教已即便白言世尊菩薩摩訶薩應當
思惟何等三昧應當親近何等三昧應當修
行何等三昧如是菩薩思惟親近及以修行
此三昧已現見何法而得安樂法何當得如

大海多聞受故云何當得如須彌山菩提心
安住不傾故云何當得如大鐵圍山一切外
道邪論不能動故云何當得如虛空一切法
無礙故云何當得如虛空心無染著故云何
當得如日輪破除一切無明闇故云何當得
民六
如月輪白淨法圓滿故云何當得如燈輪作
法光明故云何當得如大炬一切受陰滅故
云何當得如火聚焚燒一切諸煩惱故云何
當得如河池泉源一切衆生隨意受用故云
何當得如大船一切衆生度彼岸故云何當

得如橋梁不沒生死煩惱中故云何當得降
 伏衆敵破壞魔軍諸憍慢故云何當得如波
 利質多羅樹為一切諸方所有衆生開七菩
 提華香風普熏故云何當得如優曇鉢華希
 有難得故云何當得如藥王等療一切衆生
 病苦故云何當得如大醫王起大悲心愍傷
 衆生故云何當得如梅檀樹除衆熱惱作清
 涼故云何當得如大雲雨等注法雨令滿足
 故云何當得如蜜器能具足說一味法故云
 何當得如師子吼能與一切衆生無怖畏故

云何當得如父母等與一切衆生安樂利益
 故云何當得見真法至如法性實際彼岸故
 云何當得解釋深趣至實義彼岸故云何當
 得巧說法辯至能分別彼岸故云何當得善
 巧說法至具足方便彼岸故云何當得分別
 了義善知字句法故云何當得正意正行具
 知足故云何當得統御大衆無所畏故云何
 當得說如實義入實際故云何當得如大海
 一切法同一味故云何當得如大山三昧安
 靜無能動搖故云何當得如門闌菩提心不

可動轉故云何當得堅固力心志具故云何
當得具足威儀不作虛誑故云何當得端正
身為他歡喜說法故云何當得最妙最上色
相故云何當得尊貴大姓家生故云何當得
大法王福報功德故云何當得具足無量辯
才故云何當得不取著辯才故云何當得不
錯辯才故云何當得分別種種名字句辯才
故云何當得不思議辯才故云何當得無邊
辯才故云何當得解脫辯才故云何當得同
義辯才故云何隨他意義辯才故云何當得

漸親近辯才故云何當得所問能答辯才故
云何當得無問自說辯才故云何當得不毀
壞辯才故云何當得無退轉辯才故云何當
得甚深句字種種說辯才故云何當得無量
無邊譬況辯才故云何當得未證大菩提已
能具足梵音聲故云何當得第一微妙音聲
故云何當得迦陵頻伽音聲故云何當得師
子王音聲故云何當得大龍王音聲故云何
當得大牛王音聲故云何當得大鍾鼓音聲
故云何當得勝妙歌讚音聲故云何當得樂

絃音聲故云何當得哀婉清美音聲故云何
 當得風雲雷震音聲故云何當得甚深莊嚴
 辯才音聲故云何當得諸妙語言文字章句
 真正莊嚴辯才音聲故云何當得甚深能大
 巧說音聲故云何當得種種譬喻辯才音聲
 故云何當得一切世間最勝供養音聲故云
 何當得共他論義辯才音聲故云何當得神
 通彼岸音聲故云何當得不忘失法音聲故
 云何當得不缺少善法音聲故云何當得諸
 善根行具足他讚音聲故如是一切悉皆具

足爾時不空見菩薩摩訶薩發如是等諸疑
 問已為重宣此義以偈問曰
 具足金色百福相 能覺一法利無邊
 最勝功德我今問 何等三昧先應思
 如來妙智無等倫 世間寧有加上者
 我今世尊修何定 所獲功德不思議
 天人大師上調御 思惟是定何功能
 菩薩於此云何修 而能安樂於一切
 云何自然多聞海 云何守護決定心
 得住諸佛功德處 云何如大鐵圍山

能除衆生諸熱病	云何施藥不望報	云何如彼優曇華	云何波利質多樹	云何發心苦輪中	云何解脫諸煩惱	云何爲衆作光明	云何如日復如月	云何無礙如虛空	是中都無恚恨心
安住淨戒得清涼	良醫救苦調御師	勇健雄猛不出世	大人相好妙莊嚴	獨超三界無與等	云何能度生死岸	云何復須觀三昧	云何同炬亦如燈	云何復得心自在	而能降伏諸外道

云何多聞如大海	云何正念與正行	云何分別名匂身	云何於義能巧便	云何說彼最勝道	云何能得妙辯才	云何等益如父母	云何得此師子音	云何甚深微妙法	云何當得如法寶
云何歎佛真實德	云何知足具思惟	云何世法及出世	云何妙知諸法相	云何而得無礙智	行於菩提大名稱	得彼深樂不思議	能令衆生無怖畏	猶蜜甜味妙無加	無量功德度彼岸

云何說彼諸衆生	生死根本如實際
云何諸法無差別	猶如大海同一鹹
云何如山定無動	不退轉心如門闌
云何一心無餘業	但求無上大菩提
云何具足諸威儀	身相端嚴見者喜
云何常生大姓家	亦受法王大福聚
云何得彼無量辯	所有言論世莫思
云何字句義深微	我今請問護世者
云何無上難得勝	親近真辯無遺忘
云何同義稱根性	若問不問斯相應

云何未證具梵音	其聲清婉甚微妙
迦陵頻伽聲可愛	大智雄猛聲遠聞
云何師子大龍音	更得深重牛王吼
云何世尊得絃樂	具足種種諸器聲
云何獲彼甜味音	而常演說衆欣樂
云何功德音無毀	其出如風若震雷
云何多種譬喻音	能宣甚深諸言說
云何所出善語音	云何諸法不忘失
云何有中獲宿命	彼諸神通云何修
云何修行無疲倦	徧知一切諸善法

如是諸法不思議 自然輪轉徧十方
 世尊我皆無復疑 是故今問歸依處
 爾時不空見菩薩摩訶薩慇懃鄭重如是問
 已即以神力身昇虛空於虛空中自然化作
 天寶華蓋莊嚴微妙七寶所成謂金銀瑠璃
 玻璃碼碯碑磬真珠具如是等種種寶飾彼
 寶蓋中雨種種華而彼眾華右遶三匝住佛
 頂上即彼華中以偈歎曰
 歸命丈夫大調御 無上正覺兩足尊
 一切世間天人輩 寧有可以比類者

長夜黑闇諸眾生 愚癡顛倒墮邪道
 極尊明智世間眼 能令還復平正路
 失於清白法種子 眾生煩惱內燒心
 勝尊猶如世父母 能令安止白法處
 遺喪善法深利人 後世方將可怖畏
 最尊成就大慈行民六 為諸眾生真導師十一
 一切眾生無善利 無有覆護無救者
 希有大悲教世師 世尊真為作救護
 爾時華中說是偈已彼華方至如來足上須
 臾即飛徧往三千大千世界徧諸佛前施散

供養彼寶蓋中復出栴檀末團大如車軸至
如來身忽然不現而彼栴檀香氣微妙充滿
三千大千世尊所有衆生得聞此香皆悉受
於上妙快樂猶如菩薩入第四禪爾時不空
見菩薩摩訶薩示現如是神通事已即白佛
言世尊是諸菩薩摩訶薩等云何當得如斯
智慧所謂大智慧速疾智慧機捷智慧猛利
智慧無相智慧巧入智慧甚深智慧廣普智
慧無畏智慧圓滿智慧云何復得不可算數
不可稱量諸妙善根所謂心如金剛善根穿

徹一切法故心如迦隣提衣柔軟善根能作
業故心如大海善根攝諸戒聚故心如平石
善根住持一切事業故心如山正善根發生
一切善法故心如大地善根負持衆生事業
故得心不隨他行善根遠離非法教誨故得
心善修行善根一切法安住故得不壞信善
根於諸如來所行之處不疑惑故信一世界
自然徧見十方諸佛亦聞彼佛宣說妙法復
見菩薩聲聞大衆又覩佛刹清淨莊嚴受用
等事悉無疑故乃至攝受決定善根於一切

時自利利他故世尊如我今者實為自利復
欲利益諸衆生故請問如來也世尊我今復
為弘廣衆生淨信心故請問如來也世尊我
今復為彼諸菩薩摩訶薩輩具足圓滿不思
議善根故請問如來也世尊我復為斯被大
精進弘誓鎧甲諸大菩薩摩訶薩故請問如
來也世尊有諸菩薩摩訶薩輩於生死中發
大精進為一切衆生而亦不取衆生之相然
是菩薩摩訶薩雖於生死煩惱中長夜度脫
一切衆生而實不住生死煩惱想世尊我為

凡六

十二

如是諸衆生故請問如來也世尊有諸菩薩
摩訶薩等行慈悲時於諸衆生都無瞋恨設
諸衆生訶責罵辱楚撻搥打種種苦迫如是
菩薩於衆生所終無報答乃至不起嫌心不
失本願無異分別及餘思惟一心修行大慈
大悲世尊我為如是住於大乘諸菩薩故請
問如來也世尊有諸菩薩摩訶薩輩為衆生
故欲捨已樂及諸樂具欲受一切熾然大苦
發如斯念我當云何令一切衆生得最勝樂
令一切衆生得大法明世尊彼諸菩薩如是

念時凡所有物若內若外無不施者無不益者無不饒者世尊我爲如斯諸菩薩故請問如來也世尊有諸菩薩摩訶薩輩被著如是精進鎧時發如斯念我今當應爲一一衆生於恒河沙劫住大地獄受諸苦惱猶入出息不以爲苦亦不退沒菩提之心世尊我復爲是諸菩薩故請問如來也世尊有諸菩薩摩訶薩輩被著如是精進鎧已發如斯念我今當爲一切衆生執諸事業廝役服勤種種承事不以爲苦於是或爲奴婢或爲僕隸或爲

質從或爲弟子我應如是乃至爲作種種眷屬成熟衆生世尊我復爲是諸菩薩故請問如來也世尊有諸菩薩摩訶薩輩爲一切衆生故發大勇猛修諸苦行捨身手足頭目髓腦或時節節支解其形析骨消髓不以爲苦無有休懈方更熾然於阿耨多羅三藐三菩提事世尊我爲如斯諸菩薩故請問世尊耳爾時不空見菩薩摩訶薩如是問已爲重宣此義以偈頌曰

我問大師諸勝智 大智彼等云何成

云何速智及捷疾 利智聰明能通達
 何因得彼甚深智 盡無邊智為我宣
 弘廣普徧一切智 是為最勝求菩提
 云何當得無怖畏 具足善巧為我說
 云何而得金剛心 一切法中無疑惑
 云何得是柔輒心 戒行清明淨如海
 云何如山不動轉 菩提決定願莊嚴
 云何行行不隨他 於義明了得安住
 云何而得不壞信 諸佛所作無復疑
 云何得彼生念智 住於一界現十方

徧觀諸佛及聞法 并大集眾亦明了
 其身不離於一刹 而能供養十方尊
 妙華眾香及塗香 諸餘眾具難可說
 心住此刹無他緣 身現十方無量土
 親承奉事彼諸佛 悉由神通力無邊
 無請我今為行慈 民六
 不自利已常益他 住於慚愧修行者
 諸有發心求佛智 為斯我請大名稱
 如是三昧云何修 善根成熟不思議
 被此忍鎧為眾生 我故為彼問無著
 我要當拔諸重苦

彼等已離衆生想	為斯故問正覺真
彼輩常住平等心	觀察衆生無異想
常能成就慈悲者	我為彼故問如來
是中應行何等法	速得如是不思議
所得功德無有邊	我為彼故請調御
被弘誓鎧勇猛人	為一衆生恒沙劫
大地獄中受酸苦	善哉安樂諸衆生
彼等無睡亦無疲	內外諸物無不施
如是攝受衆生者	我今為彼問普觀
呵責毀辱及捶罵	身受煎迫衆事苦

為他奴婢及僕隸	皆由斯輩請世尊
無量百千數億頭	有來求者皆能捨
當捨頭時極歡喜	為求無上妙菩提
為諸衆生而更捨	手足及以身餘股
救解失道衆生類	除撥生死還正路
又施妻妾及男女	七寶珠玉及金銀
亦捨上妙衆器具	我為彼故問如來
捨身命財無厭倦	長夜聽說不疲勞
心常寂滅行頭陀	我以彼故問正覺
真實妙語恒繫心	麤鄙惡言聞即離

而施他所無嫌恨 我緣彼故諸自在
 常以慈心觀衆生 其猶父母愛一子
 而於怨親行平等 故我為彼請人王
 現有如斯諸功德 然我今日以宣陳
 其或未具諸衆等 我亦為是諮問佛
 世尊我今有善根 初發問時便尅獲
 藉此菩薩諸功德 速登寂靜三昧王

佛說大方等大集菩薩念佛三昧經卷第六

音釋

剗 於九切 剗也
 斫 先擊切 斫也
 撻 他達切 打也
 股 公戶切 股也

永樂北藏

菩薩念佛三昧經

第二五册

佛說大方等大集菩薩念佛三昧經卷第七

隋天竺三藏達磨笈多譯

讚三昧相品第九

爾時世尊讚不空見菩薩摩訶薩言善哉善哉不空見汝於往昔乃能供養無量無數諸

氏七

佛世尊於諸佛所種諸善根具足修行諸波羅蜜一切法中所作已辦而常為彼諸眾生輩作不請友為行大慈成就正信諸眾生故請問世尊如斯大義為被大鎧諸眾生故請問世尊如是大義為不動不退大菩提心諸

眾生故請問世尊如斯大義為不壞信意諸眾生故請問世尊如斯大義為發弘廣大願莊嚴諸眾生故請問世尊如斯大義為不思議善根諸眾生故請問世尊如斯大義為著不思議鎧甲諸眾生故請問世尊如斯大義為超越三界諸眾生故請問世尊如斯大義為專精實義諸眾生故請問世尊如斯大義為隨順大智諸眾生故請問世尊如斯大義為樂甚深法行諸眾生故請問世尊如斯大義為重布施諸眾生故請問世尊如斯大義

為重開示諸衆生故請問世尊如斯大義為一切能捨內外身財諸衆生故請問世尊如斯大義為成就最上無上戒聚諸衆生故請問世尊如斯大義為深忍相應諸衆生故請問世尊如斯大義為勇猛精進諸衆生故請問世尊如斯大義為得深禪定諸衆生故請問世尊如斯大義為深重智慧諸衆生故請問世尊如斯大義為以資財方便巧攝一切諸衆生故請問世尊如斯大義又為心若金剛諸衆生故為心如門闌不動不轉諸衆生

故為心如淨水無有塵垢諸衆生故為心如迦耶隣提衣諸衆生故為樂入深義諸衆生故為尊重正法諸衆生故為捨擔能擔諸衆生故為不惜身命諸衆生故為不樂一切世間有為諸衆生故請問如來如是大義不空見汝於今者能為如斯諸大菩薩摩訶薩輩請問如來如是義耳爾時世尊復告不空見菩薩摩訶薩言不空見汝應諦聽善思念之吾當為汝廣分別解說時彼不空見菩薩摩訶薩即白佛言善哉世尊如蒙聖說一心諦

受佛言不空見有菩薩三昧名念一切佛菩薩當應親近修習觀察思惟如是三昧既能修習觀察思惟此三昧已則得增廣成就現前安樂法行故則待增廣無貪善根故則得增廣無瞋善根故則得增廣無癡善根故則得具足慚愧故則得成就神通故則得圓滿一切佛法故則得清淨一切佛土故則得天降下生具足故則得入胎具足故則得住胎清淨具足故則得母生微妙清淨具足故則得家生清淨具足故則得諸根微妙清淨具

足故則得大人相清淨具足故則得諸妙好清淨具足故則得出家具足故則得最上寂靜具足故則得大寂靜具足故則得諸通具足故則得為一切衆生作歸依具足故則得多聞具足故則得世間出世間法具足故則得一切諸法住處具足故則得巧妙方便知出世法具足故則得善通達一切諸法具足故則得巧如前際後際法相具足故則得善巧莊嚴文字句義具足故則得智慧具足故則得微妙神通具足故則得巧轉變心具足

故則得善教示他具足故則得為他衆生及
富伽羅勝負白黑上下滿缺增損勝力具足
故則得是處非處具足故則得未成阿耨多
羅三藐三菩提趣向具足故則得正行具足
故則得意具足故則得自在具足故則得神
通具足故則得尊勝大家具足故則得大姓
具足故則得端正具足故則得大威具足故
則得大光明具足故則得作諸功德具足故
則得大功德具足故則得大人牛王具足故
則得令他歡喜音具足故則得令他深歡喜

音具足故則得微妙音具足故則得梵音具
足故則得相應辯才具足故則得無諍辯才
具足故則得無著辯才具足故則得稱實辯
才具足故則得種種辯才具足故則得一切
言音辯才具足故則得所生不離諸佛世尊
而常恭敬供養具足故則得離邊地生具足
故則得生中國具足故則得徧遊諸世界禮
拜承事諸佛世尊諮請論義具足故則得成
就無量無邊功德具足故則得一切菩薩功
德莊嚴具足故乃至則得菩提樹下道場莊

嚴具足故爾時世尊為重宣此義以偈頌曰

不空見斯勝三昧 如我今住智德中

其有菩薩能修行 彼見十方一切佛

當即速獲諸神通 因是復覩清淨刹

遂能下生妙具足 入胎具足亦復然

住胎之時無有比 母最清淨勝家生

一切相好咸具足 亦當修彼諸行法

捨家出家離眾欲 捐棄人欲及與天

彼為世間求菩提 所生常有諸甘露

亦得諸通及神足 轉智圓滿彼世間

多聞總持大德人 行行斯由多聞海

統諸大眾義明了 巧知眾生方便學

諸法行處皆悉知 世間之法及出世

智人所知智具足 遠離諸業及癡惱

有為之法盡皆捨 而常親近於無為

常以天眼觀眾生 復用天耳聽聞法

宿命明白知過往 他心善達前人意

神通變化自在遊 心能巧轉隨所用

得大名聞行佛國 能廣利益諸世間

明達是處及非處 一切諸法靡不知

深照淨法及垢染	以常修習勝三昧
能得正行具足人	彼之智慧實無比
具正思惟大威德	亦得安住正修行
復生大家及尊姓	衆事端嚴見者喜
彼雖處於有為中	所作功德無能壞
所生常受大功德 <small>四七</small>	往來多作人中王 <small>五</small>
或為忉利釋天尊	時作光天及梵主
凡所出聲悉無比	梵天妙響師子音
諸龍美音徧行中	大功德聲牛王吼
備於絃樂及歌聲	迦陵頻伽音精妙

能會義理令衆歡	以獲三昧故得然
善出清雅及好聲	多用愛言悅一切
深婉妙音并善語	彼聲常有未曾絕
行步舉動若龍王	普放電光照一切
降雨滂洽於大地	是謂龍德難稱量
如是人龍所遊處	住斯妙定勝神通
無量無數諸化身	徧諸佛前等供養
偈頌譬喻諸種作	言詞雅正理趣安
彼常法樂與衆生	得是勝定故無礙
所生不離於諸佛	亦見菩薩及聖僧

恒居利益無難處 成就三昧照十方
欲徧諸佛有諮論 或生無量難思刹
現前供養一切佛 成就三昧故若斯
如是功德不可說 超過數表絕稱量
道樹等覺恒俱生 諸佛咨嗟惟此定

正觀品第十

爾時不空見菩薩摩訶薩白佛言世尊若諸
菩薩摩訶薩欲得成就諸佛所說菩薩念佛
三昧者彼菩薩摩訶薩應當親近修習何法
能得成就思惟三昧耶爾時世尊告不空見

菩薩摩訶薩言不空見若諸菩薩摩訶薩欲
得成就諸佛所說念佛三昧欲得常親一切
諸佛承事供養彼諸世尊欲得疾成阿耨多
羅三藐三菩提者當住正念遠離邪心斷除
我見思惟無我當觀是身如水聚沫當觀是
色如芭蕉虛當觀是受如水上泡當觀是想
如熱時燄當觀是行如空中雲當觀是識如
鏡中像菩薩若欲入是三昧當應深生怖畏
之想當念遠離譏嫌免他訶責當念除去無
慚無愧成就慚愧當應成就奢摩他毗婆舍

那當應遠離斷常二邊常念一心精勤勇猛
除去懈怠發廣大心常念觀察三解脫門常
念先生三種正智常念斷滅三不善根常念
成就諸三昧聚常念成熟一切衆生常念等
爲衆生說法當觀四念處所謂身念處受念
處心念處法念處當念四食過患所謂搏觸
思識等於是食中生不淨想當念四無量所
謂修於大慈行於大悲安住大喜具足大捨
當念成就諸禪而不味著然後思惟一切諸
法常念不惜其身不保其命捨身及心攝受

多聞念如是法應如是護不得誹謗多聞法
財如所聞法如義受持於諸佛所起尊重心
又於法僧生肅恭意親善知識遠離惡友除
滅世間無義語言不著世樂不捨空閑住於
一切生平等心於諸衆生無有退沒無損害
心亦無妬嫉於一切法起稱量心不作罪惡
心無垢染一切諸法無處可得常求甚深廣
大經典於中恒起增上信心莫生嫌疑無爲
異意如是經典最勝廣大常念誦持常思演
說何以故是爲諸佛世尊道法獨能生成佛

菩提故於當來世得彼無量諸佛功德應當
爲他如法宣說降伏憍慢莫亂正聞恭敬尊
重供養是法捨諸欲求息諸諍競除諸睡眠
滅諸疑網殄絕迷惑明識我見不事戲論遠
離尼乾邪命自活遮羅迦波黎婆闍語言論
等常應善住檀波羅蜜中圓滿尸波羅蜜常
念羸提波羅蜜不捨毗梨耶波羅蜜遊戲禪
波羅蜜具足般若波羅蜜棄捨身命無愛惜
心如四大性不可改變如於地界起平等心
水火風界亦復如是成就身業心意精勤無

不活畏不貪衣食湯藥牀鋪房舍殿堂一切
衆具樂行頭陀常住知足不求利養不事名
聞凡是愛著悉滅無餘觀四念處斷四顛倒
不念惡刺求度四流修四如意住四威儀當
具五根亦增五力應滅五蓋不用五情遠離
五濁成五解脫得入五身內自思惟廣大聖
智正觀五陰不行六塵降伏六根亡滅六識
斷絕六受除六渴愛行六念處及六智分法
於六通中常求利益修七覺分通達七界滅
除七使及七識住離八怠惰除八妄語明了

世間八法所因應得八種大人覺法證八解脫修八王道親近思惟廣大分別專精遠離九衆生居滅九種慢捐棄九惱常思九種歡喜等法親近修習九次第定終不念行十種惡業而勤造作十善業道常求如來十種力智不空見我今為汝略說如是菩薩摩訶薩念佛三昧法門諸所當得大利益事若有菩薩摩訶薩應當修學念佛三昧如是修者名報佛恩思惟是者即不退轉於阿耨多羅三菩提亦當滿足彼諸佛法乃至能為一

切衆生作大依止亦令成就無上種智故不空見斯諸菩薩摩訶薩有大智故乃能思惟非彼聲聞辟支佛人得觀察也不空見若人於此念佛三昧或時親近思惟修習若受持若讀誦若書寫若教他書寫若教讀誦受持若少開發若為解說若能廣宣彼雖少時勤苦疲勞然其所作終不虛棄必獲果報得大義利不空見彼菩薩摩訶薩以為他受持法政速得不退阿耨多羅三藐三菩提於當來世決定作佛不空見當知如是念佛三昧則

為總攝一切諸法是故非彼聲聞緣覺二乘境界若人暫聞說此法者是人當來決定成佛無有疑也爾時世尊為重宣此義以偈頌

曰

若人欲修此三昧 能念一切諸如來

彼既思惟是法門民七 諸非法處當遠離

亦當遠離無慚愧 破除斷見及與常

復應安住三空門 當念勤修解脫智

既拔三種不善根 即亦思惟三善本

若知觀察三受處 得斯妙定良非難

若人欲求勝三昧 先應持戒後修智

自然遠離諸邪見 亦無戲論及語言

次第觀受斯皆苦 然後觀察生滅心

若人思惟三昧時 當應深念出世事

諸法有疑咸悉除 得此三昧甚為易

亦應善通四念處 先當觀身不暫住

恒求解脫及禪定 不愛壽命豈惜身

弗以多聞陵侮人 寧當誹謗於正法

聞正法已能思惟 晝夜受持身所誦

尊重諸佛深敬法 承事僧眾不敢輕

善知識所常念恩	遠離一切諸惡友
不與惡人同坐起	除彼為眾說法處
為求最上菩提故	終勿捨離阿蘭若
一切眾生皆平等	於諸法中莫分別
欲求彼法真實際	諸法相中無著心
彼輕慢意悉能除	不久必得此三昧
明識我見及疑心	亦當觀察諸調戲
不得起於惡欲意	應滅諍競與睡眠
若不學彼外道法	諸是戲論自然除
但能隨順佛法言	求此三昧須臾獲

常行布施及戒忍	勇猛精進無倦時
恒處禪思及智慧	自然得斯三昧行
能施頭目無愛畏	捨餘諸物終不疑
彼趣菩提無艱難	亦速獲斯凝靜定
若能持心如大地	又同水火及與風
更等虛空無邊涯	彼人速得此禪定
若有精誠身口意	彼不貪食及衣財
其於眾具既無求	能如是修證三昧
應當專念四正勤	亦當成彼諸神足
速須遠離顛倒想	煩惱棘刺先斷除

當念杜絕四流河	亦思乾消諸渴愛
具足五根及五力	分裂破壞五蓋衣
五種欲事不俱懷	內心幻偽亦宜捨
復當願求五解脫	思惟五身三摩提
應速觀知五陰處	正心和敬於六緣
彼不恭慎應遠離	亦當減損六觸身
於六受處心正觀	常念斷除六種愛
復以六通成就世	亦修六念及智明
勤求七覺七聖財	必須捨彼疑惑處
欲得三昧恒若斯	漸當散滅諸煩惱

彼常遠離七識住	斯八顛倒亦拔除
若能住於八正道	自當速證此深定
恒住八大丈夫行	復以八解自娛心
不染八法離世間	獲最勝智當不遠
於他人所無瞋心	先應除此九種慢
思九歡喜根本法	得彼次第九種禪
絕此十惡不善因	應修智人十種善
若能修行十種力	得是三昧終無艱
當念攝持諸善法	放捨不善眾惡緣
前後勤求彼正念	證此三昧豈能久

若住如是三昧已 當轉智力不思議
徧見諸佛金色身 所生常得聞正法
若欲見彼諸世尊 或已滅度及現在
當來一切愍世者 應思惟此勝三昧
思惟三昧品第十一

爾時不空見菩薩摩訶薩白佛言世尊若諸
菩薩摩訶薩念欲成就諸佛所說念佛三昧
者云何思惟而得安住佛告不空見菩薩言
不空見若諸菩薩摩訶薩必欲成就是三昧
者先當正念過去所有諸如來應供等正覺

次念現在所有諸如來應供等正覺次念未
來所有諸如來應供等正覺彼如是念一切
三世十方世界中是等一切諸如來應供等
正覺明行足善逝世間解無上士調御丈夫
天人師佛世尊天降成就入胎成就住胎成
就出胎成就出家成就諸功德成就諸根成
就諸相成就諸好成就莊嚴成就戒品成就
三昧成就智慧成就解脫成就解脫知見成
就四無畏慈悲成就喜捨成就慚愧成就威
儀成就諸行成就奢摩他成就毗婆舍那成

就明解脫成就解脫門成就四念處成就四
正勤成就四如意足成就五根成就五力成
就覺分成就正道成就往昔因緣成就雙教
示成就諸通教示成就大通教示成就戒品
成就一切三昧成就無礙利益成就為他利
益無礙成就一切善法成就清淨色成就清
淨心成就清淨智成就諸入成就金色百福
成就時彼菩薩念諸如來如是相已復應當
念彼諸如來應供等正覺心無動亂亦常安
住無所著心心無著已彼復應作如是思惟

是中何等名曰如來為當即色是如來耶為
當離色是如來乎若以色法為如來者彼諸
衆生皆有色陰一切衆生應是如來若以離
色為如來者離色則是無因緣法無因緣法
云何如來菩薩如是觀知色已次復觀受彼
時更作如是思惟為當即受是如來耶為當
離受是如來耶若即受法為如來者彼諸衆
生皆有受陰一切衆生應是如來若離受法
為如來者離受則為無因緣法彼無緣法云
何如來彼既如是觀色受已乃至觀識亦如

是時彼菩薩復如斯念若此諸陰非如來者
豈彼諸根是如來乎如是念已則先觀眼為
當即眼是如來耶為當離眼是如來乎若即
彼眼是如來者一切衆生皆有是眼一切衆
生應是如來若離彼眼是如來者離眼則為
非因緣法彼非緣法云何如來菩薩如是觀
察眼已觀耳觀鼻乃至觀意亦如是時彼菩
薩復如斯念若此諸根無如來者豈彼諸大
有如來乎如是念已則先觀地為即地界是
如來耶為離地界是如來乎若即地界為如

來者彼內外法皆屬於地如是地界應是如
來若離地界為如來者離地即為無因緣法
彼無緣法云何如來彼既如是觀察地界乃
至觀彼水火風界亦是而彼菩薩能作如
是正思惟時不以色觀察如來不離色觀察
如來如是不以受不離受不以想不離想乃
至不以識不離識觀察如來亦是又彼觀
時亦不以眼觀察如來不離眼觀察如來如
是不以耳不離耳不以鼻不離鼻乃至不以
身意不離身意觀察如來亦是又彼觀時

不以色觀察如來不離色觀察如來如是不
以色不離色不以聲不離聲乃至不以觸法
不離觸法觀察如來亦是又彼觀時不以
地觀察如來亦不離地觀察如來如是不以
水不離水乃至不以風不離風觀察如來亦
如是彼菩薩如是觀時即能於彼一切法中
善通達知明了無礙爾時彼菩薩復應當作
如是思惟是中更以何等真法而能得彼阿
耨多羅三藐三菩提為以身得菩提耶為用
心得菩提乎若身得者而今此身無覺無識

頑癡無知譬如草木若石若壁然彼菩提非
色非身非行非得不可見聞不可觸證此身
如是云何能得成就菩提若心得者而即此
心本自無形無有相貌不可見聞不可觸證
不可執持猶如幻化菩提如是亦無有心無
有觸對不可見聞不可知證此心如是云何
能得成就菩提不空見是為菩薩正念思惟
不以身心亦不離身心而能證得阿耨多羅
三藐三菩提耶佛言不空見然彼菩薩常應
如是觀察思惟若能如是觀諸法時即得安

住於正法中心無遷變不可移動當知爾時
 具足菩薩摩訶薩法自然遠離不善思惟速
 疾成就阿耨多羅三藐三菩提正覺平等真
 實法界爾時世尊為重明此義以偈頌曰
 過去未來諸世尊 現在一切徧見者

冥心空寂行慈愛 欲覩諸佛無艱難
 往昔諸佛大威光 憐愍世間等與樂
 彼念人中分陀利 調御丈夫功德滿
 更念下生及入胎 住胎尊母皆具足
 愚彼生家衆妙相 當見等覺弗為難

亦念諸好勝莊嚴 及彼本願先所行
 微言妙義初中後 彼皆善逝解脫身
 住解脫門及供養 正勤與彼四神足
 應念諸根具滿者 力菩提分亦復然
 若念諸佛解脫尊 不久當到勝寂地
 一切世間利益念 凡七 善法功德難思量
 妙色及與清淨心 復思世尊衆好分
 金剛身體百福相 當知如來諸念滿
 何等法中名如來 正當觀察無邊處
 諸佛非色復非受 非彼想行非識心

如是等法非如來	正見智人亦應體
亦非離彼是諸佛	應供善逝但有名
諸佛非眼非耳鼻	非舌身意及法等
亦非離彼為如來	正覺莊嚴惟名耳
惟有大名無真佛	離名何處有實者
智人若知盡和合	當取等覺實非難
若以諸陰為如來	彼諸衆生皆有陰
衆生即應是諸佛	以陰平等斯共有
不以色等為諸佛	亦不離陰名如來
無量數劫正思惟	不思議智乃成就

身如草木及石壁	菩提無色寂無生
亦無頑身及草木	云何說身證菩提
是心無相復無形	菩提非心亦無狀
非身非心能得證	亦非無證難思議
是為最勝寂靜地	外道於中皆荒迷
若於此法求正勤	必當速得是三昧

佛說大方等大集菩薩念佛三昧經卷第七

音釋

搏變官切入汝典切刺刺七自切
執聚也 滅也 芒刺也

七界謂害界悲界出界欲界色界無色界及波界也

佛說大方等大集菩薩念佛三昧經卷第八

隋天竺三藏達磨笈多譯

思惟三昧品之餘

爾時不空見菩薩摩訶薩復白佛言世尊菩薩摩訶薩當何證知捨離我見耶佛言不空見若諸菩薩摩訶薩得證知時無有住著則離我見如是菩薩雖無住著而能為彼一切世間天人衆生作大利益云何利益所謂為大法明然大法炬吹大法螺擊大法鼓奮大法執乘大法船設大法橋方當欲度一切衆

生出於生死四流暴河置於涅槃無為彼岸即當觀察是身本性空當觀身不淨臭穢腐爛癰膿屎尿盈溢是身無常不暫停住破壞枯槁不可長久誑惑小兒危脆不堅猶水沫聚戶蟲充滿筋骨相輔空負而行無實用處或經百年及百千歲縱八萬劫一切樂具守護長養終歸墮壞此身長夜不離煩惱不出顛倒恒為諸惡鳥獸食噉又亦常與地獄餓鬼畜生共行生死往來受諸苦惱或為奴隸種種苦事常繫於他不得自在而彼所生云

何當能見苦斷集證滅修道今我此身但是
空虛誑曜愚癡無一堅法以是我今當應持
此一切身分施諸衆生若有衆生寶重己身
我當爲彼放捨身命若有衆生須我精氣我
當給與彼之精氣若有衆生須我肉者我當
以肉供奉彼等何以故寧我先施令彼得食
無容不施使彼自食今我以此淨心布施所
獲善根願即滅除我見根本而彼菩薩如是
觀時不著我見滅我見已然後捨身令衆生
用爲惜命者棄捨命根須精氣者授以精氣

須肉食者便以肉施若有衆生須其力用即
時爲奴充彼驅策不空見以是因緣彼菩薩
摩訶薩除捨我見不住我見證知我見而能
於此不牢固中求牢固身不空見譬如都城
邑聚村落之中多有童男或多童女自舍出
已至河_{民八}岸邊見水沫聚以彼水沫更相嬉戲
所謂破壞水沫分段磨滅令其消散無有遺
餘而彼沫聚不作是念誰於今日能分散我
是沫雖壞無惱恨心不空見如是菩薩摩訶
薩自觀己身無常破壞如彼沫聚不可長久

當知是人得此三昧疾成阿耨多羅三藐三

菩提爾時世尊為重明此義以偈頌曰

若能遠離我見者 一切無有住著處

為利世間天人故 當證難見大菩提

彼若厭身諸不淨 癰瘡所處膿血流

此身變壞不堅牢 無常羸劣斯破法

暫住如幻無實體 猶彼聚沫空無真

長夜養育終無宜 鳥獸斯食最可惡

雖以眾具供贍之 是身會當歸敗滅

既不能得牢固法 經無量劫惟有苦

地獄畜生餓鬼苦 飢渴眾惱恒熾然

世間催切超百羅 初不覺知彼如實

我身今日自空虛 不常之體須臾變

謂諸眾生食肉者 精氣僕役我甘為

我思此時常發言 其有食肉及精血

我為其故今放捨^{凡八} 任從噉食我此身

當令一切寶身者 悉得觀我捨斯命

我今軀命不敢愛 願速成彼三摩提

猶如彼沫常破壞 未曾起一瞋恨心

今我此身如沫團 豈有生於嫌怨事

若能觀身如水沫 此人必定求菩提
非但得奉十方尊 彼當速獲勝三昧

示現微笑品第十二

爾時世尊怡然微笑諸佛世尊法如是故即
微笑時世尊口放種種光明所謂青黃赤白
金色玻瓈其光遠照上至梵宮而復還下右
遶三帀入世尊頂時尊者阿難見斯事已即
從座起整理衣服右膝著地合十指掌向佛
世尊以偈問曰

最勝世尊非無因 今現微笑當有以

世間調御應為說	而復微笑何因緣
金剛色體百福身	由證真如能利益
一切世間所歸依	今此微笑有何緣
世尊無上亦無比	何處當有能超勝
功德備具無可毀	今斯微笑有何緣
一切世間皆歸趣	調御丈夫今當宣
誰於今日獲大利	世尊無何微笑者
今日誰當受大位	今日誰得真福聚
今日誰為安隱王	能致世尊是微笑
一切世間所歸依	天人大師今應說

若聞佛尊斯妙音 天人歡喜衆聖讚

尊者阿難設斯問已於是世尊告阿難曰阿
難我當說是正念三昧法門義時此大衆中
有三萬人遠離塵垢得法眼淨復有八萬億
百千那由他諸天子遠塵離垢得法眼淨復
有三萬比丘比丘尼衆得阿那舍果復有三
萬比丘比丘尼優婆塞優婆夷得無生忍法
復有三萬衆生發阿耨多羅三藐三菩提心
此輩皆於星宿劫中成等正覺此即前發菩
提心者是也復有九萬億那由他菩薩摩訶

薩安住菩提無有退轉此輩當來皆得成佛
彼諸世尊有四種號或號光明或號毗盧遮
那或號釋迦牟尼或名日月歲星有如是等
諸種名號隨其刹土出現於世復有九十二
億百千那由他衆生但發聲聞心是輩未來
皆證聲聞果

爾時世尊知是事已以淨天眼過於人眼觀
察十方見九十億百千那由他諸佛世界應
作如是大利益故更出殊大微妙之聲徧此
三千大千世界咸得聞已然後及彼諸佛國

土所有衆生亦皆得聞然後復從眉間白毫
 相中放大光明名無邊威此光徧照十方佛
 國令無量億百千那由他衆生得須陀洹果
 斯陀含果阿那含果阿羅漢果復有過於前
 數衆生發阿耨多羅三藐三菩提心彼等當
 來皆得不退轉於阿耨多羅三藐三菩提然
 後於彼十方國土皆得成佛號曰難伏如來
 應供等正覺出現於世爾時世尊欲重宣此
 義以偈頌曰
 過百千數無減少 三種三十復九十

如是一切見菩提 彼為發心利益故
 彼滿十千諸衆生 復三萬智得淨眼
 聞已正思等正覺 解脫人身諸惡道
 復過八億那由他 諸天獲於聖淨眼
 以聞如來妙音故 永滅惡趣無遺餘
 得忍三萬億由他 發心即離三惡道
 彼輩當來悉成佛 其猶盛春草木敷
 復有三萬億衆生 從座而起發大心
 以此威德當成佛 於大地上利世間
 復有六萬諸天子 皆發無上菩提心

彼等斯同彌勒尊 以修樂因證樂處
以是因緣天人師 為斯廣大故微笑
我已宣揚微笑旨 阿難當知比笑緣

神通品第十三

爾時不空見菩薩摩訶薩白佛言世尊云何
當知菩薩摩訶薩住於慚愧遠離於彼無慚
愧已然後當得此三昧耶爾時佛告不空見
菩薩言不空見若有菩薩摩訶薩常行慚愧
而是菩薩行慚愧時或能造作種種惡事所
謂身惡行時即生慚愧口惡行時亦生慚愧

意惡行時亦生慚愧起嫉妬心亦生慚愧起
懈怠心亦生慚愧於諸如來所亦生慚愧於
大菩薩摩訶薩所亦生慚愧於住菩薩乘諸
衆生所亦生慚愧於聲聞乘人所亦生慚愧
於辟支佛乘人所亦生慚愧於人天所亦生
慚愧云何慚愧民八所謂常愧於他亦慚自身住
於一切不善法中故常慚愧住慚愧已遠離
一切無慚無愧除滅不善思惟善事荷負重
擔體性清淨終無毀犯他不能謗而是菩薩
常能具足無毀身業亦能具足無毀口業亦

能具足無毀意業具足斯已然後乃能住是三昧住三昧已常不遠離見一切諸佛常不遠離聽聞諸佛所說妙法常不遠離恭敬供養一切聖僧具足如斯已然後乃能疾成阿耨多羅三藐三菩提復次不空見我念往昔過無量無邊阿僧祇劫時有大劫名曰善來於彼善來劫中復有第三劫名曰寶炬不空見彼於劫中復有小劫名九莊嚴於彼時中名多劫濁復次有劫名曰千歲彼中有轉輪名善觀作而彼善觀作王宿植德本具大

威德不空見時善觀作王所居大城名曰淨華妙香充滿其城東西廣六十由旬南北長七十由旬墻壁周圍有一千二百重彼城身量純以真金衆具莊嚴間用七寶不空見汝今欲知淨華香城善觀作王果報衆具莊嚴殊麗如先所說無邊精進王善住大城無差民八異也不空見彼城北面有一內門名曰華鬘七門外有園名曰無畏其園縱廣四十由旬周帀皆有七寶樹林而爲圍遶有一大池形量方廣面十由旬八功德水彌滿其間如忉利

天鏤陀吉尼池也彼池四面周帀皆有寶多
羅樹其金多羅樹銀爲花果銀多羅樹瑠璃
華果如是乃至眞珠多羅樹金爲華果如善
住城一等無異復次不空見當爾之時有佛
世尊號耆耆羅娑如來應供等正覺明行足
善逝世間解無上士調御丈夫天人師佛世
尊出現於世不空見時彼耆耆羅娑如來處
遊居止無畏園中與大比丘衆九十九億百
千那由他人俱前後圍遶皆阿羅漢諸漏已
盡無復煩惱皆得自在心善解脫慧善解脫

所作已辦捐捨重擔盡獲已利不受後有隨
順正教達於彼岸不空見時彼耆耆羅娑如
來應供等正覺於晨朝時著衣持鉢與九十
九億百千那由他聲聞大衆左右圍遶入淨
華香城不空見時彼善觀作王知彼世尊晨
朝入城即自莊嚴乘大調象名曰樂手與無
量億百千那由他衆前後導從自彼淨華香
城而出爲奉迎彼佛世尊故不空見時善觀
作王既遙見彼耆耆羅娑如來應供等正覺
遠狀若金山諸根寂靜神志和穆已達第一

調柔彼岸猶如大龍降伏一切亦如大象所
爲自在又如大池澄清映徹如是見已自乘
而下進詣世尊頭面作禮右遶三匝而啓白
言唯願世尊受我明朝所設供養復次不空
見時彼鵞耆羅娑如來應供等正覺聞善觀
作王如是請已凡八爲諸衆生作利益故默然受
請復次不空見時善觀作王聞彼世尊許納
其請即於斯夜速命廚官嚴辦種種上味美
食人間所有靡不畢具於淨華城平治道路
以諸香塗泥飾其地所在街巷建立寶幢妙

善名幡處處羅布兼列種種金寶器具又用
上妙牛頭栴檀以爲香水灑散其地復以種
種末香種種散華上徹於佛而爲供養然後
於彼如來應供等正覺前燒種種名香積種
種華鬘而爲供養又以種種歌頌讚歎偈句
法言而爲供養又作種種上妙樂音及諸玩
具而爲供養彼王如是作諸供養然後奉獻
上妙飲食供養世尊及比丘衆復次不空見
爾時彼善觀作王廣設如是微妙第一最上
眾具滿足供養鵞耆如來應供等正覺已更

於異時莊嚴大駕躬自率彼無量千數諸衆
生等詣無畏園至彼鶯耆如來應供等正覺
所頂禮尊足已而白佛言世尊今正是時惟
願垂慈作所應作也復次不空見時彼鶯耆
羅娑如來聞善觀作王慇懃請已知諸衆生
堪受化故於是為彼如所應作種種神通現
神通已遂與九十九億百千那由他諸阿羅
漢等身昇虛空住虛空已即放九十九億百
千那由他光明照於東方無量世界如是復
放前數光明照彼南方及以西北四維上下

周徧十方亦皆如是彼一一方各有九十九
億百千那由他諸大光明彼一一光皆各化
作八十億百千那由他等大蓮華座彼諸華
座皆各有一化如來坐彼諸如來形量長短
乃至一切威儀多少一如鶯耆羅娑如來應
供等正覺無差別也不空見如彼變化諸佛
世尊各有無量億那由他諸比丘衆前後圍
遶住虛空中又亦各有化天帝釋及化梵王
形量大小皆如今此無超勝梵天及人供養
天帝釋等無有異也不空見時彼鶯耆羅娑

如來應供等正覺示現如是神通事時於須臾間一切諸天所有音樂不鼓自鳴一切衆具不作自現不空見時彼欲界諸天既覩耆耆世尊示現如是大神變時即以天栴檀末百沉水香多加羅香多摩羅跋牛頭栴檀黑沉水香等奉散佛上復以種種妙華所謂雞娑羅華大雞娑羅華等奉散於彼耆耆羅娑如來應等正覺上復次不空見爾時耆耆世尊告彼善觀作王言大王諸行無常大王諸行皆苦大王諸行無我大王諸行暫住不得

久傳大王諸行不堅是破壞法大王諸行熾然如猛火焰大王諸行深奧如大火坑大王乃至應常念捨諸行當生深厭亦不可樂當念遠離終思解脫不空見爾時善觀作王一心合掌恭敬向彼耆耆如來具領讚曰如是民八如是大德修伽陀大德娑伽婆諸行無常大德娑伽婆諸行是苦諸行無我大德娑伽婆誠如聖教一切諸行皆應遠離亦須棄捨終當免脫不空見爾時彼耆耆羅娑如來爲彼善觀作王說如斯法令其歡喜令其專念令

其奉行令歡喜已令專念已令奉行已然令發阿耨多羅三藐三菩提心復次不空見爾時耆耆羅娑如來見善觀作王聞法歡喜發菩提心一切衆生咸得益已即與九十九億百千那由他諸阿羅漢比丘大衆舉身騰涌足步虛空出淨華城然後還下如常威儀前後圍遶入無畏園不空見時彼善觀作王既得親覩耆耆羅娑如來應供等正覺廣現如是神通事時發菩提心更作誓曰當令我等於未來世悉獲如是大神通慧復當令我悉

得如是統諸大衆復當令我於未來世悉得如是天人衆前大師子吼一如今日耆耆如來應供等正覺無有異也不空見時彼善觀作王見彼世尊耆耆羅娑如來應供等正覺及諸大衆乘空而返王便嚴駕奉從世尊達本住所然後乃還復次不空見後於異時彼耆耆如來應供等正覺與諸大衆次第而行至善觀作王宮殿中已當鋪而坐諸比丘僧亦次第坐已爾時彼善觀作王及諸大臣與其眷屬各自圍遶城內人民及其眷屬亦各

園遶又皆自持所有供食各自手奉齋者世
尊及諸弟子聲聞大衆其食香美衆味具足
隨意奉上佛及衆僧一切噉食皆得充滿然
後更以種種妙香種種花鬘種種衣服種種
珍寶一切衆具微妙音樂供養恭敬已即於
是日呼召太子加以天冠授以王位棄四天
下及諸眷屬深厭生死詣佛出家即於齋者
佛世尊所鬪除鬚髮法服著身時有八萬四
千億百千那由他人民善根既淳熟故亦深
厭世從王出家復次不空見時彼善觀作王

既出家已即於衆中整理衣服恭敬合掌遂
便請彼齋者如來應供等正覺言世尊云何
菩薩修習思惟念佛三昧耶菩薩摩訶薩云
何證此念佛三昧即得住於不退轉地速疾
成就阿耨多羅三藐三菩提現前成就諸功
德法不空見時彼善觀作王比丘如是問已
彼齋者如來即便告彼王比丘言善觀作汝
應當知有二種法菩薩摩訶薩具足修習即
便得此菩薩念佛三昧能速成就阿耨多羅
三藐三菩提何等爲二一者信諸如來不生

違逆二者信佛所說不敢謗毀作如斯念是
 為諸佛廣大境界不可思議善觀作是為菩
 薩摩訶薩得此三昧能速成就阿耨多羅三
 藐三菩提善觀作復有二法菩薩摩訶薩具
 足修習能速成就阿耨多羅三藐三菩提何
 等為二一者奢摩他民八二者毗婆舍那十二善觀作
 是為菩薩摩訶薩具足修習得此三昧能速
 成就阿耨多羅三藐三菩提善觀作復有二
 法菩薩摩訶薩具足修習得此三昧能速成
 就阿耨多羅三藐三菩提何等為二一者遠

離斷見一者滅除常見善觀作是為菩薩摩
 訶薩具足修習得此三昧能速成就阿耨多
 羅三藐三菩提耶善觀作復有二法菩薩摩
 訶薩具足修習得此三昧能速成就阿耨多
 羅三藐三菩提何等為二一者住於羞慚二
 者修於恥愧善觀作是為菩薩摩訶薩具足
 修習得此三昧能速成就阿耨多羅三藐三
 菩提復次不空見時彼如來如是說已彼善
 觀作王比丘復白耆耉羅娑如來言世尊云
 何菩薩摩訶薩住慚愧已而能得斯念佛三

昧耶爾時鶩耆羅娑如來應等正覺即告彼
 善觀作比丘言善觀作若諸菩薩摩訶薩於
 諸所作常行慚愧謂起身惡行生慚愧心起
 口惡行生慚愧心起意惡行生慚愧心起嫉
 妬時生慚愧心起懈怠時生慚愧心於諸佛
 所生慚愧心於諸菩薩摩訶薩所生慚愧心
 於住諸菩薩乘衆生所生慚愧心於諸聲聞
 乘所生慚愧心於諸辟支佛乘所生慚愧心
 於諸天人所生慚愧心
 佛說大方等大集菩薩念佛三昧經卷第八

音釋

靴徒刀切 癰腫於容切 膿腫血也 臄臄此病
 也易斷 筋骨舉欣切 鏤奴冬切 鶩耆羅娑此云分
 者渠伊 於良切

佛說大方等大集菩薩念佛三昧經卷第九

隋天竺三藏達磨笈多譯

神通品之餘

云何慚愧所謂常慚於人亦愧自身往於一切不善法中常行慚愧成就慚愧遠離不善

凡九

念求善事身荷重擔種姓清淨無所虧犯時彼善觀作王比丘既從彼佛聞教誨已住於慚愧為滅一切不善法故勤求精進及以意欲一心迴向往住諸善法又令滿足更廣思惟不令忘失專精攝心住於正觀深入法界如

是比丘觀法界時不見一法增不見一法減彼既觀法無增減已彼當如是見一切法無有去來彼當如是見一切法無得喪彼當如是見一切法無有生滅彼當如是見一切法無有差別彼當如是見一切法無有異彼當如是見一切法因緣生彼當如是見一切法猶如夢想彼當如是見一切法猶如陽焰彼當如是見一切法猶如鏡像彼當如是見一切法猶如形影彼當如是見一切法猶如聲響彼當如是見一切法猶如幻化彼當如是

見一切法無有勝負彼當如是見一切法本無優劣彼當如是見一切法不可成就彼當如是見一切法本來不生彼當如是見一切法無有生處彼當如是觀一切法皆悉平等不空見彼既能作如是觀已亦即能作如是修行不久便能得是三昧不空見而彼善觀作王比丘得此三昧已即能成就無礙辯才說諸法義無有窮盡又彼善觀作王比丘即於爾時過六十億百千那由他劫已然後得成阿耨多羅三藐三菩提不空見汝今於此

猶有疑心我為汝釋令得除斷不空見當知彼時善觀作王捨四天下五欲眾具與彼八萬四千億那由他臣民大眾於彼齋者佛世尊所同時出家剃除鬚髮精勤修道者非謂異人汝亦不應更作他觀何以故不空見當知彼時善觀作王比丘今彼蓮華上如來是也又於爾時善觀作王捨四下一切樂具與八萬四千億那由他臣民大眾齋者佛所出家修道住慚愧行正觀諸法一心思惟未幾即使證此三昧也復次不空見以是因緣

我於今者懇懃鄭重為汝宣說此三昧門所作功德甚深廣大不可思議當知非彼不能廣種勝妙善根諸衆生輩而得聽聞而能讀誦受持修行乃至為他解說義理復次不空見若有諸善男子善女人但能耳聞此三昧者當知彼諸善男子善女人輩終非薄福種少善根也亦非一如來所種諸善根也亦非二三四五諸如來所種諸善根也亦非一十二三十四十五乃至非一百諸如來所種諸善根也亦非二百三百乃至千萬億諸

如來所種諸善根也如是乃至亦非於無量億百千那由他乃至亦非於無量阿僧祇及過無量阿僧祇爾許諸如來所種諸善根厚集功德而獲聞此寶三昧王名字少分何況當能書寫披讀讚誦受持思量義趣如法修行為多人衆凡九分別解釋也復次不空見若彼一切善男子善女人輩但得耳聞此菩薩念佛三昧門者應知彼善男子善女人非是薄福種少善根者當知彼諸善男子善女人等即是具足菩薩乘者何以故不空見若人得

聞此三昧王當知彼輩依其次第自然證成
阿耨多羅三藐三菩提惟除一切諸漏盡者
爾時不空見菩薩白佛言大德世尊所住行
阿耨多羅三藐三菩提大德世尊彼等當證
此三昧王耶彼佛報言不空見如是如是彼
等亦證此三昧王也復次不空見譬如有一藥
名曰真正若以其藥用塗軍鼓於鬪陣時以
推擊打假令陣中有為毒箭刀稍所傷彼藥
力故皆即平復安隱無患如是不空見若有
善男子善女人但能耳聞此三昧王名字少

分者彼等以此三昧名聲威力皆當得成阿
耨多羅三藐三菩提惟除漏盡身證之人復
次不空見譬如須彌山王四寶所成若諸衆
生至其所者即同其色何以故以彼山威光
皆同一色如是不空見若彼善男子善女人
耳暫聞此寶三昧名彼等皆以三昧名聲威
德力故自然速成阿耨多羅三藐三菩提惟
除漏盡正位諸富伽羅何以故不空見以此
三昧有不思議勝功能故復次不空見譬如
一切大河陂池及以諸流皆入大海同一鹹

味悉由大海德力弘故如是不空見彼諸善男子善女人但能耳聞此三昧名假令不讀不誦不受不持不修不習不為他轉不為他說亦復不能廣分別釋然彼諸善男子善女人皆當次第成就阿耨多羅三藐三菩提何以故以此三昧名聲勝故威德力故復次不空見若有諸善男子善女人誠言時善說時但能誠言及與善說諸佛法門必定當得開示興顯能廣利益諸世間者是名誠言是名善說不空見若彼善男子善女人能得正言

及善說者必定當得無量無邊過阿僧祇不可思議大功德聚何況彼能善說於此菩薩念佛三昧法門所獲功德聚也不空見假使無量無邊恒河沙菩薩摩訶薩復經無量無邊過恒河沙劫數修行布施無暫休廢我若說是所得功德不可思議今更為汝廣分別說若復有一菩薩摩訶薩能聽受斯念佛三昧若讀誦若受持若少分修行若少分論說所得功德望前布施不可喻比不可稱量不可計校不可算數不可宣說何況有能具足

聽受修行演說是功德聚而可校量耶爾時
世尊為重明此義以偈頌曰

我念往昔無量劫	有佛世尊耆耆耆羅
一切世間所歸依	具大慈悲演妙法
於彼所見無不知	過去未來悉明了
亦能通達 <small>凡九</small> 現在事	等見幽微 <small>五</small> 斯覺察
諸佛智慧難思議	憐愍衆生故為說
愚癡衆生苦煎迫	觀彼一切興悲心
時彼如來有如是	九十九億聲聞衆
咸具自在有生盡	悉共圍遶正法王

彼城東北有園林	具足莊嚴名無畏
如來大仙住於此	兼彼億衆阿羅漢
彼善觀作轉輪王	嚴備寶駕自城出
無量臣民衆圍遶	一切衆生皆愛樂
王觀世尊心寂靜	身口清淨諸根調
具足勝妙諸威儀	彼善觀王轉增敬
王便往詣彼佛所	頭面頂禮世尊足
啓口請佛受其供	世尊許納故默然
王以如來許受故	即勅城內諸臣民
今宜具辦微妙供	吾欲奉獻耆耆佛

衆事既嚴王親告
 大師世尊及聖僧
 鴛耆如來赴王請
 遂作無量千億光
 彼一一光出無量
 微妙鮮明人喜樂
 汝不空見知諸華
 意念現前人瞻仰
 諸行無常亦實苦
 終是破壞不堅牢
 惟願哀愍照此時
 受我今日微末飯
 大功德聚廣現神
 普照十方諸佛土
 百千億數大蓮華
 爲發衆生諸善本
 各出化諸如來形
 十方同說如斯法
 復說無我極羸劣
 孰云智者生貪樂

諸行焚燒如猛火
 燄赫炫熾甚難當
 佛爲衆生發深厭
 百千樂音俱時作
 異哉希有難思議
 設諸供事不可量
 此四天下可重尊
 投棄五欲如脫履
 便爾請問微妙定
 丈夫能入三昧門
 住於二法善思惟
 得不思議最上樂
 鴛耆世尊如是說
 當自證此微妙禪
 當住何等勝法已
 佛前鬚髮服袈裟

王蒙彼佛誠實言	深心歡喜觸斯定
常念菩提奉諸佛	即受尊號上蓮華
若能信受如來語	於是經典無復疑
入佛境界深法門	自然得入此三昧
若聞實際不驚疑	於法亦無我人想
勤念奢摩毗婆舍	如是深思觸勝禪
住於慚愧及恭敬	常應修習諸正勤
知己惡現生恥心	證三昧王豈能久
恒觀諸法不見增	亦自弗知諸法減
見一切法如虛空	菩薩智人通達此

諸法非興復非喪	本性清淨常湛然
知一切法同睡夢	如是見者逮三昧
於彼不作差別相	本不見滅亦無生
猶如陽焰及鏡像	能如是見得三昧
法相平等無高卑	亦無存亡及優劣
如彼聲影與幻化 ^九	如是見人證三昧 ^七
諸法寂然無勝負	不見外相及內心
無有成就復無名	如是見者證三昧
比丘如是專精觀	初中後夜常思惟
頂受尊教於佛所	不久當證此三昧

彼當證此三昧時 已於菩提無缺減
亦見十方一切佛 供養功德大衆生
過是六十億百千 那由他劫修諸行
承事無量諸佛已 然後證彼大菩提
汝不空見今應知 爾時彼王其誰是
智人不當生異見 蓮華上佛即善觀
我今教誡於汝輩 一切世間諸天人
若欲究竟諸法源 當念速淨此三昧
彼必大集功德聚 不可算數難稱量
欲得妙樂不思議 要先淨修此三昧

若欲盡見一切佛 現在未來及十方
或復求轉妙法輪 亦先修習此三昧
若欲圓滿諸妙相 具足衆妙上莊嚴
及求轉生清淨家 必先受持此三昧
汝不空見諸衆生 即欲遠離諸惡道
悉欲知於下生者 應常讀誦此三昧
彼非供養於一佛 亦非二三及四五
乃至億數那由他 方得聞斯勝三昧
彼供諸佛過僧祇 爲證無上大菩提
及衆所欲皆悉得 乃得聞此勝三昧

彼供無量百數佛	過去久種諸善根
常生歡喜尊敬心	方得說此勝三昧
彼事無量千數佛	天中勝天能放光
精勤修習無懈倦	爾乃讚誦三昧經
彼見無量億數佛	無邊淨光若日輪
厚習一切諸善根	然始得聞妙三昧
又如世間攻戰場	其中多有被毒害
彼或遇聞藥鼓音	眾毒消除得安樂
若人說此三昧時	其或得聞勝定者
三昧威力證菩提	非彼漏盡正位人

彼定功德等須彌	若人證時無異相
其或能往到山所	即同其色難別知
若人得聞三昧聲	諸定中勝猶如海
由斯三昧威德力	彼證菩提不復疑
亦如眾流歸大海	大河小河及陂池
等同一味難別知	彼亦如是無異相
若人聞此三昧時	即念十方一切佛
三昧威力登正覺	非彼身證富伽羅
若諸菩薩唯修檀	過於無邊恒沙劫
供養十方一切佛	下及法界諸眾生

如是曠劫行布施 所獲功德雖言多
猶不及說妙定門 起一念慈被一切
三昧善思如慈母 光顯聖德難度量
智人若能一心求 當速成佛具自在
說修習三昧品第十四

爾時不空見菩薩摩訶薩白佛言世尊菩薩
摩訶薩具足幾法當能入斯念佛三昧耶佛
告不空見菩薩言不空見若諸菩薩摩訶薩
具足三法即能入此念佛三昧何等爲三一
者具足不貪善根二者具足不瞋善根三者

具足不癡善根若能具足三善根已即得成
就六波羅蜜而彼菩薩摩訶薩以能住彼不
貪善根故而常行施具足成就檀波羅蜜所
主常得家產豐饒財寶具足所須便至永離
貧窮有大威德有大勢力其心弘廣無復陞
劣自然攝彼貪不善根以能具足諸福德故
衆生見者莫不尊敬凡所言說人皆信行不
用多功獲此三昧速疾成就阿耨多羅三藐
三菩提又彼菩薩以於一切世間天人諸衆
生所無有瞋恚忿恨之心故故能具足不瞋

善根而常住彼尸波羅蜜羸提波羅蜜能具
足滿忍波羅蜜已或逢罵詈謗毀楚撻搥
割截手足挑髓破腦一切諸苦競來迫切不
怒不恨不恚不瞋於是除滅瞋不善根起大
慈心徧覆一切衆生界已所生不離諸佛世
尊夢寤常安天神衛護刀仗不害毒不能中
火不能燒水不能溺常足飲食湯藥衣服卧
具種種衆物一切世間天人衆生見者讚美
不久即能證此三昧當能速成阿耨多羅三
藐三菩提又彼菩薩以能具足無癡善根故

長夜修習奢摩他毗婆舍那具足方便善能
斷除癡不善根成就微妙甚深智慧於一切
法了了分明諸異論門無有罣礙若他問難
辯釋無疑不空見是為菩薩摩訶薩具足三
法證此三昧當能速成阿耨多羅三藐三菩
提復次不空見菩薩摩訶薩復有三法能入
三昧復能速成阿耨多羅三藐三菩提何等
為三一者觀一切行無常如實知二者觀一
切行苦如實知三者觀一切法無我如實知
菩薩若能如是觀已不久即能入此三昧不

九

十

空見是為菩薩摩訶薩具足三法能證三昧亦速成就阿耨多羅三藐三菩提復次不空見菩薩摩訶薩復有三法能入三昧亦能速證阿耨多羅三藐三菩提何等為三一者如來現在修諸供養若滅度後或時供養諸佛舍利或以種種上妙香華及以華鬘塗香末香燒眾名香然燈旛蓋寶幢音樂等若自供養或復教他常發誓願願我所生以此供養行願善根令我速得念佛三昧亦當證成阿耨多羅三藐三菩提二者若佛現在及入涅槃

繫讚說如來真實功德若戒若定若智慧若解脫若解脫知見若威儀若神通若辯才若無諍若慈悲若喜捨及餘世尊諸功德法皆常讚說亦發誓願願我從今讚歎諸佛所獲福聚所得功德藉此善根當令我得念佛三昧復能速成無上道果不空見是為菩薩摩訶薩成就三法能入三昧亦能速成阿耨多羅三藐三菩提復次不空見菩薩摩訶薩復有三法不久則能成就三昧亦當速證阿耨多羅三藐三菩提何等為三一者若諸菩薩

摩訶薩或從一切佛世尊所聞此三昧真實功德或時但聞三昧名字即自思念如彼過去諸如來應等正覺本行菩薩求菩提時彼輩皆求如此三昧是以聞此三昧即生隨喜我於今日為大菩提亦應勤求如是三昧成就具足大利益故是故我今聞此三昧功德名字深生隨喜是名具足第一隨喜法也二者如彼未來一切諸如來應等正覺為求菩提行菩薩時修此三昧為大利益是故我今聞此三昧亦生隨喜是名第二具足隨喜法

也三者如今現在所有十方無量無邊諸如來應等正覺現住世者已度諸有已拔習根斷滅語言遠離覺觀證甚深定具大慈悲亦於往昔行菩薩時聞此三昧皆生隨喜我今既獲聞此三昧何獨不可起隨喜乎如是念時深生隨喜是名具足第三隨喜法也不空見是為菩薩摩訶薩具足成就三種隨喜所獲功德及諸善根願與衆生同證三昧亦速成就阿耨多羅三藐三菩提復次不空見若彼諸善男子善女人輩於此三昧生隨喜時

所得功德真實廣大無量無邊難可稱說我
今為汝引諸譬喻開示少分令汝知耳不空
見如此三千大千世界其間所有諸恒河沙
若人取彼諸恒河沙聚置一處然後於彼大
沙聚中取一凡九一沙末為微塵然後將此沙之
一塵過恒河沙世界更復過彼無量無邊阿
僧祇不思議不可稱不可量恒河沙等世界
已然後方乃置一微塵如是次第一切沙塵
計諸世界悉皆布盡不空見汝意云何假使
彼世間人頗能少知世界數不不空見言無

也世尊不空見且置是事假使世間聰明智
慧第一算師盡其智力及以算術頗能稱量
頗能思察復能數知世界數不不空見言無
也世尊無也世尊今我所見惟有上座舍利
弗及彼不退轉地諸菩薩摩訶薩輩應少髮
髻耳佛言不空見若有善男子善女人以上
爾所諸世界盛滿七寶及餘眾具持用供養
一切眾生不空見汝意云何彼人如是供養
行檀所獲功德寧為多不不空見言甚多世
尊無量世尊佛言不空見我更語汝彼善男

子善女人雖能以上一切世界盛滿七寶衆具
具供施一切衆生功德雖廣然故不及前善
男子善女人等聞此三昧寶王名字發起三
種隨喜之心誓願迴向阿耨多羅三藐三菩
提所得功德何以故不空見以彼三種由多
聞生也彼多聞從正說起故不空見由彼正
說故能生一切善根即此三昧也何等三昧
能生一切善根所謂即此菩薩念佛三昧也
又復能生一切善根亦即正說何等正說謂
正說時善說是也以是義故彼三種隨喜所

獲功德望布施福不可稱量不可校比復次
不空見我念往昔過於無量阿僧祇復無量
阿僧祇劫爾時世界名動不動彼界有佛號
曰寶山莊嚴如來應供等正徧知明行足善
逝世間解無上士調御丈夫天人師佛世尊
出興於世得大自在調伏一切具足解脫永
度彼岸最上最妙最勝無比能為衆生作大
歸依能與衆生為大覆護能治衆生諸煩惱
病通達三世無明了以自證法為衆生說
其所說法初中後善其義深遠其言巧妙純

一無雜具足清白梵行之相為諸衆生常如是說時彼寶山如來應等正覺住一王城城名伏怨與三十億那由他百千聲聞大衆皆是學人當有所作當有所斷當有所得應受世間天人供養不空見時彼寶山如來從三昧起作如斯念今我此三十億那由他百千聲聞皆是學人所作未辦未到彼岸我於今者應為此等如法而說當令一切速得漏盡不空見爾時彼寶山莊嚴佛廣現如是大神通事令彼三千大千世界盡皆煙出猛焰熾

然不空見爾時彼聲聞衆觀彼如來廣作如是大神通事見已歡喜踊悅徧身猶如比丘入第四禪彼聲聞衆身心快樂亦復如是復次不空見爾時彼佛於靜夜中顯示如是神通事已因即告彼聲聞衆言汝諸比丘應當觀此三千大千世界滿中煙出又復猛火焰熾炯然諸比丘一切諸行無常亦爾諸比丘一切諸行苦事亦爾諸比丘一切諸法無我我所無有堅牢虛妄不真可破可壞皆滅盡相諸比丘我今略說一切諸行乃至一切放

捨莫著深生厭離自然解脫不空見爾時彼三十億那由他百千聲聞衆等蒙彼如來說如是法如是教誡皆得漏盡通達諸法於諸法中無有罣礙善住諸法度諸疑網於教師所聽受法已於諸法中了無所畏發大聲言如是婆伽婆如是世尊諸行無常如是世尊諸行是苦如是世尊諸法暫住如是世尊諸法破裂不可依止如是世尊諸法熾然猶如草木及以石壁如是世尊一切諸行乃至可放可捨可厭可脫不空見時彼寶山莊嚴如

來以如是神通以如是說法以如是教誡三種示現化諸聲聞衆令入三解脫門謂空無相願已復有三十億那由他百千諸菩薩衆皆當得成阿耨多羅三藐三菩提不空見爾時彼佛為彼三十億那由他百千諸菩薩衆說此三昧寶王三昧九如是顯示已復為彼天人世間作利益故經八萬四千億那由他百千歲轉正法輪已然後於彼無餘涅槃而般涅槃爾時不空見菩薩摩訶薩白佛言世尊彼寶山莊嚴如來現前教化幾菩薩衆彼佛說度

後法住幾時耶佛告不空見菩薩摩訶薩言
不空見於此三千大千世界所有星宿其數
可知然後寶山莊嚴如來應等正覺邊際數
量難得知而彼如來般涅槃後正法住世
滿八十億那由他百千年像法住世二十億
歲其後未幾復有佛出名曰慈行如來應等
正覺出現於世壽命無量其佛身量滿一由
旬爾時衆生身以量足長六拘盧舍其蓮華
狀大者高三由旬小者猶高六由旬徧滿
大地所有衆生往返周旋行住坐卧皆各在

於蓮華之上爾時世界名盛蓮華其地柔輒
猶如羊毳毛衆生觸者如天妙衣其色光澤
狀忉利天黃白之石彼諸衆生等受快樂亦
如他化自在天宮彼諸衆生欲度東海瞬息
之間便到彼岸南西北海駿速亦然彼諸衆
生凡所之從發心即至而彼慈行如來初成
佛時其地廣博盡四海邊時彼大地縱廣正
等滿八十億那由他百千由旬諸聲聞衆皆
悉充滿諸阿羅漢多一坐食惟除侍者阿難
及金剛密迹阿斯多等復有八十那由他諸

大菩薩摩訶薩眾一切皆住不退轉地彼諸
菩薩諮問甚深妙定法門而彼慈行如來為
諸菩薩開發顯示深法門時慈行世尊惟出
一音即說斯偈

若人方便求出家

應當一心思妙法

彼必摧壞惡魔軍

猶如香象破草屋

誰求疾成大菩提

應為世間常說法

而欲淨斯最勝地

此三昧樂則能為

佛說大方等大集菩薩念佛三昧經卷第九

四九

十六

佛說大方等大集菩薩念佛三昧經卷第十

隋天竺三藏達磨笈多譯

說修習三昧品之餘

時彼慈行如來大化將末有一比丘名曰樹
王廣爲衆生說此三昧示教利喜於彼如來

第十

應供等正覺滅度之後正法之際有轉輪王
名曰天主具足威德有大神通七寶金輪正
法治世不空見彼天主王所居大城名曰因
陀羅跋帝縱廣正等十二由旬其城內外樓
觀臺殿皆以七寶雜色所成復以金廊而覆

城上不空見彼城四面各有三門若說其城
諸莊嚴事如上所說精進力王善住大城莊
嚴華麗殊妙無差也不空見後於一時夜過
半已彼天主王睡猶未覺有淨居天下降王
所令王夢見即於夢中爲王說此念佛三昧
法門名字大王汝應求此念佛三昧何以故
若諸菩薩摩訶薩能得成就此三昧者常不
遠離諸佛世尊亦於世間出世間文字章句
音聲語言皆悉明了具足辯才自然速成阿
耨多羅三藐三菩提不空見時天主王夢見

天已即便覺寤白彼天言諸天人輩如是三昧誰能持者彼天報曰大王汝寧不聞耶今有比丘名曰樹王現能受持如斯三昧廣爲世間分別演說利益一切人天大衆不空見彼天主王當得聞此三昧名時即能受持思惟觀察并亦誦念彼比丘名過是夜已即於晨朝捨四天下金輪王位亦復棄捨八萬億百千那由他後宮妃后女侍之屬又盡放棄五欲衆具斯皆爲是三昧王故王時復與九十六億百千那由他衆生求彼比丘捨家出

家不空見時彼樹王比丘與四部衆天龍夜叉及人非人周匝圍遶復有九十億欲界諸天左右聽法復有八十那由他諸菩薩衆在前讚說是三昧王分別解釋顯其義趣彼天主王至其所已即以衆寶散比丘上然後方始五體投地一心頂禮彼比丘足又以八十寶箱各容一斛盛滿金華奉散其上復以天華所謂優鉢羅華鉢頭摩華拘物頭華分陀利華曼陀羅華摩訶曼陀羅華用散其上復以天諸妙香所謂天沉水香多伽羅香多摩

羅跋牛頭梅檀黑沉水梅檀末香等用散其上廣設如是衆供具已然後請爲比丘弟子即於是日與九十六億百千那由他臣佐民人在比丘前剃除鬚髮服袈裟衣馱世出家皆爲求此妙三昧故是後其天王比丘常得與彼九十六億那由他百千眷屬比丘親近供養恒河沙等諸佛世尊亦皆爲此勝三昧故不空見爾時彼天王比丘經八十四億那由他百千歲以種種衆具供養事彼樹王比丘求此三昧讀誦受持如說修行教諸弟子

終不暫懈又彼眷屬比丘大衆勇猛精進亦無倦心不空見彼天王比丘及其眷屬於樹王法師生尊重心起諸佛想聞說妙法一心受持長夜精進初不休息彼樹王比丘皆悉成就彼九十六億百千比丘行菩薩行住不退地然後滅度^{民十}彼諸眷屬皆亦^三命終時復有佛名閻浮幢如來應供等正覺出現於世而彼天王比丘與諸眷屬而更於彼閻浮幢如來應供等正覺所勤求諮問如此甚深三昧經典讀誦受持思惟其義如說修行爲他解

釋利益世間一切天人爲證無上大菩提故
又彼天王比丘爲此無上勝三昧故廣分別
說諸佛所宣甚深經典過三千劫已然後作
佛又能教化無量大衆皆得成熟畢竟安住
不退轉地悉受阿耨多羅三藐三菩提記佛
告不空見汝今當知爾時彼天主王者豈異
人乎即今之最上行如來應供等正覺是也
是故汝今不應疑惑復次不空見汝當一心
思惟觀察此三昧王善根淺深功德少多吾
今爲汝少分說耳若彼世間無量無邊億那

中他百千衆生但能耳聞此三昧名當來必
定成等正覺何況此衆菩薩摩訶薩親於我
前或在我後聞我廣說此三昧王若讀誦若
受持若思惟義若修行若能爲他稱揚廣說
也不空見若有菩薩摩訶薩住菩薩乘聞此
三昧經於心耳彼亦不久必當成就阿耨多
羅三藐三菩提復有初住菩薩乘諸菩薩等
即便速證不退轉地於阿耨多羅三藐三菩
提亦不爲遠復次不空見譬如夜分將盡其
日未出東方明相始現之時閻浮提人莫不

歡喜何以故知彼日輪不久當現廣為世間
作大照明令閻浮人咸得覩見若善若惡淨
穢諸色得有所作如是不空見若有善男子
善女人者但能聞此念佛三昧經於耳者彼
輩不久盡得成於阿耨多羅三藐三菩提是
故汝等於此三昧作決定心起不壞信莫生
異見勿懷疑網復次不空見如劫將盡彼第
六日現世間時如是一切三千大千世界大
地盡皆煙出煙既出已當知不久第七日出
一切世界皆悉洞然如是不空見若有善男

子善女人或已住彼菩薩乘中及未住者若
曾聞此念佛三昧經於耳者或時讀誦或有
受持或思惟義或如說行乃至或能為他廣
說彼等決定速得成就阿耨多羅三藐三菩
提復次不空見如人穿井若見濕土黏汗手
足或時復見水泥雜和智者當知去水不遠
如是不空見若有善男子善女人聞此菩薩
念佛三昧正意受持諦善思惟分別義理廣
為他人宣揚解釋當知彼諸善男子善女人
不久自成阿耨多羅三藐三菩提復次不空

見譬如有人吞金剛丸當知是人不久必死
何以故彼金剛丸不可消故如是不空見若
有善男子善女人但能聽聞如是三昧或復
思惟或常親近或亦修習或能宣說當知彼
諸善男子善女人不久必成阿耨多羅三藐
三菩提何以故此三昧者即是過去現在未
來三世一切諸如來應供等正覺思惟修習
清淨成就真實金剛無有虛偽不可破壞復
能教化諸菩薩輩令其安住以諸菩薩必能
安隱住於大乘故復次不空見譬如三十三

天見歡喜園皆生安樂如是不空見彼一切
菩薩摩訶薩皆因聞此三昧名字故能速成
阿耨多羅三藐三菩提以是三昧法門名字
往昔諸佛之所讚歎爲他廣說釋解理義開
發顯示名味句身具足圓滿安住法界擁護
攝持諸大菩薩教化增長令樂真道正直淳
和常受安樂不空見以是因緣汝應知此若
諸菩薩聞此三昧暫經心耳如是諸善男子
善女人不久當證阿耨多羅三藐三菩提不
空見吾故語汝汝當善知若諸菩薩摩訶薩

聞此甚深念佛三昧能受持者彼等善男子
善女人自然疾成阿耨多羅三藐三菩提復
次不空見汝應受持如是三昧常念爲彼一
切世間比丘比丘尼優婆塞優婆夷及諸國
王大臣宰相利利婆羅門毗舍首陀一切乞

士并餘種種外道尼捷遮羅迦波利婆闍迦
等班宣廣說何以故以此三昧大威德力能
令彼等速成阿耨多羅三藐三菩提故復次
不空見若有善男子善女人淨信敬心分明
知此念佛三昧過去諸佛之所讚歎一切如

來之所印可如是知已當即讀誦當即受持
當即修行當即敷演復應當作如是思惟念
此三昧爲不思議大功德聚如是思已當更
信敬當更尊重當更深入當更證知所以者
何今此三昧乃是一切諸佛之所說也一切
諸佛之所行處也一切諸佛之所印可也一
切諸佛之正教也一切諸佛之辯才也一切
諸佛之所覺也一切諸佛之選擇也一切諸
佛之所作也一切諸佛之財寶也一切諸佛
之府庫也一切諸佛之伏藏也一切諸佛之

倉廩也一切諸佛之印璽也一切諸佛之舍利也一切諸佛之體性也不空見若彼善男子善女人等能如是知即得無量無邊善根緣此功德所生常處大利利家大婆羅門家及餘一切大威勢家大尊重家大德天處乃至當證阿耨多羅三藐三菩提何以故不空見由此三昧具足能得不思議出世間果報聚故不空見彼善男子善女人若但耳聞此三昧名當得無量無邊福聚亦復當作無量無邊福行然彼所得福聚善根福行功德廣

大甚深不可校計不可算數不可稱量不可得知復次不空見言粗若此義尚未明我今為汝更引譬喻令諸智者少分解之不空見若有菩薩摩訶薩專心信樂修行檀波羅蜜日三時施於日初分以神通力故即令七寶及餘眾具充滿於彼恒沙世界民十還用奉上恒沙如來應供等正覺及諸弟子聲聞眾等如日初分如是行施日中後分行施亦然日別如是三時行施乃至經彼無量無邊億那由他恒河沙劫而常行是無有休廢亦復求於

阿耨多羅三藐三菩提不空見於意云何彼
菩薩摩訶薩能於如是長時行施所獲功德
可謂多不不空見言甚多世尊無量無邊不
可算數不可稱量不可思議也時佛復告不
空見菩薩言不空見吾更語汝汝宜諦聽假
彼菩薩摩訶薩如是修行檀波羅蜜所種善
根所獲福聚實爲廣大然猶不及斯善男子
善女人但能耳聞此三昧名或時書寫或時
讀誦或時信解如來所說深妙法門少功德
也不空見然此善男子善女人但以聞名所

獲功德尚超前福無量無邊不可稱量不可
校比何況彼善男子善女人具足得聞是三
昧能即書寫讀誦受持思惟義理善能爲諸
人天大衆宣揚廣釋也不空見汝今當知我
但略說三昧功德若欲廣說此定善根假經
多劫終不能盡

諸菩薩本行品第十五

爾時不空見菩薩摩訶薩善見菩薩摩訶薩
善喜光菩薩摩訶薩無邊見菩薩摩訶薩無
邊莊嚴菩薩摩訶薩無邊幢菩薩摩訶薩無

邊光明菩薩摩訶薩無邊稱菩薩摩訶薩無邊禪菩薩摩訶薩無邊智菩薩摩訶薩無邊發王菩薩摩訶薩無邊自在王菩薩摩訶薩思惟最勝無邊菩薩摩訶薩思惟一切法意菩薩摩訶薩思惟虛空意菩薩摩訶薩思惟無礙意菩薩摩訶薩無邊寶意菩薩摩訶薩能滅一切怖畏菩薩摩訶薩善淨意菩薩摩訶薩如是等菩薩摩訶薩爲首與九十億那由他百千菩薩摩訶薩俱從座起偏袒右肩右膝著地合掌恭敬而白佛言世尊我等從

佛聞是菩薩念佛三昧功德利益我等要當躬自書寫讀誦受持思惟義理廣爲他說亦令他人如說修行何以故我等爲欲攝受阿耨多羅三藐三菩提故世尊我等於此諸佛世尊所說三昧甚深經典令諸衆生聞已歡喜我等亦當益其氣力與其安樂所以者何彼等若能於是大乘修多羅中次第修行聞已書寫讀誦受持分別思惟廣爲他說亦令他人分別解說必得成就阿耨多羅三藐三菩提故爾時世尊知諸菩薩摩訶薩等一心

念求遂便微笑諸佛世尊法如是故即微笑
時世尊面門放種種光所謂金銀瑠璃玻瓈
碼碯碑磔真珠如是一切諸寶光中各皆復
出無量百千異色光明皆自世尊面門而出
徧遊十方無量世界上至梵宮九還住佛頂如
天帝釋建立寶幢端直光華見者歡喜時此
三千大千世界莊嚴壯麗微妙無比爾時彼
諸菩薩摩訶薩衆見是神變莊嚴事已咸皆
驚歎竒哉希有世尊神通於是衆中有一菩
薩摩訶薩名如意定智神通即從座起正持

威儀合掌恭敬頂禮世尊已用天沉水香多
伽羅香多摩羅跋香牛頭栴檀末栴檀等奉
散佛上復以天曼陀羅華摩訶曼陀羅華天
優鉢羅華波頭摩華拘物頭華分陀利華雞
娑羅華摩訶雞娑羅華等供養世尊已說偈

讚曰

世尊調御無倫匹 金色相好具足人
光明威德徧十方 狀若林間開華樹
妙行圓滿智無邊 大威能爲世間益
最勝方便願演說 今復微笑有何緣

世尊無等無邊智	挺超衆類誰能加
無上威德今應宣	何因今日復微笑
今此世界徧大千	華敷盡若帝天樹
一切衆生皆歡喜	今更微笑何所因
盲者能視聾得聞	瘖者得言蹇能步
狂亂失心獲本念	今復微笑何因緣
群獸喜躍悉鳴吼	異鳥歡欣吐清音
衆樂不鼓自然鳴	今者何因復微笑
一切樂音同時作	本非天人之所鼓
而令人天獲安樂	今更微笑何所緣

彼天觀人明照此 斯人今亦見彼天
 天人交發希有心 何緣今更現微笑
 無上丈夫世依止 大尊今日爲我宣
 若聞大慈憐笑者 惟深慶幸豈能報
 爾時世尊即爲如意定智神通菩薩摩訶薩
 宣說大士所有妙問亦即宣彼恒沙諸如來
 應供等正覺名號其偈詞曰
 諸善男子等 聞法王妙聲 彼六十八千
 悉發菩提願 亦於當來世 正法毀壞時
 世尊自護持 如是深妙典 我聞大名稱

終無有厭倦 不思議法門 諸佛之所說
汝聽我今說 斯諸菩薩衆 非但一佛所
發此誠敬心

我念往昔諸生處 六十六億那由他
爾時皆亦如斯起 惟爲護持此深法
又復過去昔於茲 無量恒沙諸佛所
於彼爲首修虔敬 最上妙法我護持
斯諸大士爲法故 能捨重命豈愛身
其何甘法不憚苦 獨爲菩提無上證
不可思議恒沙數 無量威德諸如來

彼時上首皆敬起 亦惟愛樂斯法故
寶光火光大光佛 電光普光不思議
斯輩三等攝持法 爲求菩提無上道
惟我神力能知汝 果報今日皆明現
不空汝久發斯願 經昔無量百千生
汝於諸佛大師前民十 不思議行悉圓滿
常業歌讚兩足尊 苦行熏修諸大誓
由往積集勝因緣 今獲偈歎大法王
往昔世尊號善眼 亦名火幢無邊威
斯輩彼時爲上首 欲求無上正覺故

往昔有佛莊嚴王	刹若他化天宮所
斯輩多是勝上士	彼時已就大菩提
過去有佛名放光	亦無邊光無量相
斯輩於彼已爲首	初求如是妙三昧
大摩尼珠火光佛	普光明聚調御師
彼時攝法爲首起	求於菩提安樂故
大光日光不思議	無量精進無邊定
於彼攝法上首起	爲求安樂菩提故
善華香佛及金華	無漏如來無諍行
彼時皆爲護法首	爲求如是上菩提

如是過去諸如來	無邊智尊兩足尊
於彼三種攝持法	祈願最上佛菩提
八萬丈夫通達士	爲證第一妙菩提
斯輩因是勝善根	當來奉侍人中覺
所生常處尊勝家	一切永除諸惡道
斯等集會爲法朋	終不遠離世間覺
長遠一切外論師	亦捨一切邪智友
攝諸功德不可說	此福要登於菩提
當來得值彌勒尊	此輩爾時皆集會
於是三業持護法	因此能成勝菩提

復於彌勒涅槃後	有佛師子調御師
亦求彼法三業持	因此得成等正覺
當來千佛無上尊	即是賢劫衆生導
斯等法師世恒說	因證無礙妙色身
過是賢劫諸佛已	復有正覺無量威
更有如來厥號賢	及以世尊毗婆尸
賢與毗婆尸滅後	復有佛出名娑羅
彼時智者皆攝持	廣設衆具興供養
娑羅世尊既涅槃	有佛如來名觀察
斯輩於彼求法故	而復供養妙法王

觀察如來涅槃已	有佛世尊名徧見
徧見如來涅槃已	有佛厥名蓮華上
華上如來涅槃已	有佛稱名優鉢羅
爾時諸智還求法	承事供養兩足尊
優鉢羅佛涅槃已	有佛世尊名曰華
彼華如來涅槃已	有佛世尊號莊嚴
莊嚴如來涅槃已	有佛世尊名勝智
斯輩於彼亦求法	興建供養無有邊
勝智如來涅槃已	有佛世尊名善見
善見如來涅槃已	有佛世尊名善持

善持如來涅槃已	有佛名曰具威儀
彼亦三種法攝持	惟求證斯菩提道
具威儀佛涅槃已	有佛世尊無量威
無量威佛涅槃已	有佛世尊名勝王
勝王如來涅槃已	有佛世尊名現前
現前如來涅槃已	有佛世尊最熾王
爾時此等為法故	廣設供養不思議
如是未來諸世尊	世間勝智超一切
於已身命無愛恪	但為求證佛菩提
因藉如斯勝善根	將來奉承勝威德

是佛人中最第一	如彼調御阿彌陀
於彼殊勝世尊所	即欲修證上菩提
為求法故常精勤	當設無邊妙供養
彼方所有諸世界	遠離衰惱除五塵
惟求法樂利群生	供養億數恒沙佛
當來成佛無邊智	能多利益滅眾苦
為求安樂諸眾生	供養無量無邊佛
當來成佛大名稱	彼刹莊嚴難思議
盡是眾寶人樂觀	猶安樂國殊廣大
多億那由諸菩薩	感受佛記人中尊

以不思議諸佛智 如是讚稱大法王

我於今者為汝說 一切大眾諸天人

其有求於正覺真 終自同彼如來證

若能願樂勝菩提 彼號上人蒙威護

諸天守衛及龍鬼 鳩槃金鳥并夜叉

若欲祈願成菩提 心常樂修佛勝道

世尊哀愍如一子 身金色力智多聞

佛說大方等大集菩薩念佛三昧經卷第十

音釋

因陀羅跋帝 梵語也此云幢跋蒲末切 寤 徒切與

同黏者也 璽 胥里切 蹇 居偃切 憚 徒按切畏

也